

Wäo ingante Itota Codito Nänö Odömongainö

Wäo wüimonte bai nänö adi, ante yewæmongainö

¹ Wëenëñedë quïnö wë wodonte bai ingatimpa, ante Itota Codito nänö odömongainö ante yewæmonte impa. Wængongui iñömö, Wantæ iñonte quïnö bai baquii, ante, Itota tömengä ingante në cædäni inänite odömoncæcäimpa, ante cædinque Itota Codito ingante edonque odömongä agacäimpa. Ayæ Itota Codito wæætë tömengä anquedo ingante, Bitö Wäo botö në cæcä weca godinque odömömi acæcäimpa, ante da pöngä ponte odömongä atabopa. ² Botö Wäömo guiquënë, Quïnö botö adinö tömänö incæ nö impa, ante yewæmömopa. Mäninö Wængongui nänö angainö ante Itota Codito incæ botö imote edonque odömongä adimo inte botö adobaï wüimonte bai tömänö botö adinö ante, Nö impa, ante yewæmömopa.

³ Wængongui beyæ botö apænedö ante ii yewæmöintaa yewæmömopa. Mänintaa adinque në apænedäni nani toquinque. Ayæ mäninta botö yewæmöninö ante ëñente cædäni nani toquinque. Edæ iimaï baquionæ wantæ iñö oo baquïnö anguënë.

*Godongämçë nani pönencabo ticete ganca inäni
beyæ Wäo yewæmongampa*

⁴ Botö Wäömo inömo imopa. Atiabæ iñömö wayömö wayömö incæ Codito ingante

godongämæ mini pönencabo önompo æmæmpoque go mencabominiya acæminimpa, ante botö yewæmömopa.

Mönö Mæmpo Wængongui wëenëhedë në quëwengaingä inte ñöwo quëwengä incæ ayæ wantæpiyæ quëwencæcäimpa. Tömengä Önöwoca incæ önompo æmæmpoque go mëwoga önöwocaidi bai ëwocadongä inte Wængongui nänö aacæ tæ contayömö tæcætawë inö në ongongampa. Inique Mæmpocä tönö tömengä Önöwoca waadete pönö cæda ate minitö gänë entawencæminimpa.

⁵ Ayæ adobai Itota Codito edæ Wængongui ingantedö ante cöwë ædæmö pönï apænedongä inte wængä ate täno ñäni ömæmongaingä ingampa. Tömengä tömämæ awënë odeyeidi näni Tæiyæ Awënë Odeye inongä ingampa. Tömengä adobai mönö imonte në waadete pönënogä inte mönö wënæ wënæ cægainö adinque tömengä wepæ inte mënogacäimpa. Tömengä adobai waadete pönö cæcä ate minitö gänë entawencæminimpa, ämopa. ⁶ Ayæ Itota, Botö Awënë Odeyebö nempo quëwëninque minitö botö tönö godongämæ aamini bacæminimpa, ante pönö badongacäimpa. Ayæ, Botö Mæmpo Wængongui ingante cæcæminimpa, ante Itota pönö cæcä ate mönö Wængongui qui, ante në godömö bagaimö imopa. Tömengä ñäö bai ëmöñongante mönö waocabo tömenganque ingante waa acäimpa. Tömenganque cöwë në tæi piñænongä inte quingämenque quëwënäni iñönänite tömengä tömänäni Awënë inongä ingampa, ante mönö cöwë angäimpa, ante Amëë, ante ämopa.

7 Ëñeedäni, tömengä edæ boguimancodë
 wææñongante,
 tömänäni tömengä ingante acædänimpa.
 Tömengä ingä nē timpogainäni incæ adobaï
 tömengä ingante acædänimpa.
 Ayæ tömämæ quëwënäni tömänäni tömengä in-
 gante adinque Ca ca wæcædänimpa.
 Mänömaï baquïnö anguënë, ante
 botö, Amëë, ämopa.

8 Wængonguï Awënë adocanque Tömää nē
 Cægaingä inte iïmaï angampa. “Botö Tänobo
 ingaïmo inte Tömämo inguïmo imopa.” Mänömainö
 ante nē angä iñömö tömengä wëenëñedë do
 quëwengaingä inte ñöwo quëwengä incæ ayæ
 wantæpiyæ quëwencæcäimpa.

*Itota Codito nē ñäö bai ëmongaingä ingante Wäö
 nänö adö*

9 Botö Wäömo inömo imopa. Minitö tönñabo
 inte botö minitö tönö Awënë Odeye Itota nempo
 quëwëninque mönö tömengä tönö godongämæ
 aamö inömö imopa. Botö minitö tönö godongämæ
 wæwëmö imö incæte mönö wæntæye inämaï inte
 ee cæmopa. Wængonguï nänö angainö ante
 apænedinque ayæ, Itota mönö Codito inongä
 ingampa, ante, Nö impa, ante botö apænedö
 beyænque botö wää tēiwænë Patömoto iñömö tee
 mönete bai quëwentabopa.

10 Wængonguï Awënë itæde iñonte Wængonguï
 Tæiyæ Waëmö Önöwoca incæ botö imote bæi
 ongonte bai cæyongä botö önöñabæ inö adocanque
 tedepämo todompeta nani ancadeca we öonte bai
 yedæ tē ëñentabopa. 11 Iïmaï angantapa. “Bitö

quïnö wüimonte bai abii, ante yewæmointaa yewæmöe. Yewæmöninque wayömö wayömö incæ Codito ingante godongämæ nani pönencabo önompo æmæmpoque go mencabodäniya iñönänite tömënäni inänite da godöe,” ante angantapa. “Epeto quëwëñömö quëwënäni Ætämidöna quëwëñömö quëwënäni Pedegämo quëwëñömö quëwënäni Tiatida quëwëñömö quëwënäni Tadoditi quëwëñömö quëwënäni Pidadedepia quëwëñömö quëwënäni ayæ Daoditea quëwëñömö quëwënäni Codito ingante godongämæ nani pönencabo nani cabo nani cabo iñönänite bitö tömënäni inänite ii bitö yewæmöninta da godömi æncædänimpa.”

¹² Äñongante botö, Æcänö äna ëñëmoo, ante dadi ëmænte atabopa. Dadi ëmæññömote yædo concædi ti wodönoincade oodo inte badöincade önompo æmæmpoque go mëa ganca ongoncade atabopa. ¹³ Ayæ yædo concædi ti wodönoincade ongöñömö adoyömö tæcæguedë adocanque në Waocä ëñagaingä bai inte ongongä atabopa. Tömengä doyæncoo önöwa ganca incoo mongæninque ayæ tæcæënëmæ inö pacadeyænta oodo inte badöi ëënëmængä ingantapa. ¹⁴ Tömengä ocabo tönö ocagui iñömö dayö näämænta pöni ëmö bai adobai encadinque yoguimö ñäö pöni ëmö bai adobai ñäö bai encacä ingantapa. Ayæ tömengä awinca incæ gonga wo bæcote bai ëmongä ingantapa. ¹⁵ Tömengä önöwa incæ yaëmenta bodonte nani änö gongapamö guii ocoi äñonte ñäö ëmö bai tömengä adobai ëwacä ingantapa. Tömengä tedeyongä æpæ mä conta goyonte æpæ tē bai adobai tē

ēñentabopa. ¹⁶ Tömengä önönempo tömempo incæ nēmöidi æmæmpoque go mēa ganca næængantapa. Ayæ tömengä önöne inö yaēmē tipængaa waingamē engamē ēnedinque yædæ tadete ongongantapa. Ayæ tömengä awinca incæ nænque nanguï tamonte bai ñäo bai emongantapa.

¹⁷ Tömengä ingä adinque botö tömengä önöwa inö wænte bai tæ gowææntabopa. Tæ gowææñömo tömengä önompo tömempo inte botö imote gampodique “Bitö guiñenāmaï incæbiimpa,” ante äninque edæ, “Tömää badönāmaï iñedē botö Do Quëwengäimo imopa. Ayæ tömää iinque bayedē incæ botö Ayæ Pönï nē Quëwëmo incæboimpa,” ante angantapa. ¹⁸ Edæ “Botö nē Quëwengäimo inömo inte nē wænimo incæ ñäni ömæmonte cöwē wantæpiyæ quëwëmo inömo imopa. Waodäni nē wænte godinäni nāni wænte ongöñömö ongöñönänite botö, Cöwē wænāmaï quëwencæminimpa, ante botö tæi piñæmämo inte nē æmo imopa.

¹⁹ “Mänömaï beyæ bitö wiimonte bai bitö adinö ante quinö ñöwo i, ante quinö iincayæ ate baquïi, ante yewæmöe ämopa. ²⁰ Mänii nēmöidi önompo æmæmpoque go mēa ganca botö önönempo tömempo incæ mæ öñoncoo bitö adincoo ante, Æbänö i, ante bitö ēñenāmaï inönö ante botö edonque pönï apænebo ēñencæbiimpa. Botö imote godongämæ nāni pönencabo önompo æmæmpoque go mencabodäniya iñönänite tömēnāni inänite nē aadäni bai nēmöidi inänipa. Ayæ yædo concædi ti wodönoincade oodo inte badöincade önompo æmæmpoque go mēa ganca ongoncadecoo bitö adincoo ante, Quinö bai inänii, ante botö adobai

bitö imite edonque pönī apænebo ate nē ēñēmi bacæbiimpa. Wayömö wayömö incæ botö imote godongämæ nāni pönencabo önompo æmæmpoque go mencabodāniya iñömö tömēnāni yædo concædi tī wodönoincade bai adobai inānīpa,” ante Waocä nē ēñagaingä iñömö botö imote apænegacäimpa.

2

Godongämæ nāni pönencabo tiæte ganca ināni inānite Itota nänö änö

Epeto iñömö quēwēnāni inānite Itota nänö änö

¹ Ayæ adocä godömenque apænecantapa.

“Epeto iñömö Wængongui ingante godongämæ nāni pönencabo inānite nē aacä acæcäimpa, ante botö änö ante iimaï yewæmoe ämopa. ‘Botö edæ nēmōidi önompo æmæmpoque go mēa ganca botö önönempo tömempo nē nææmo imo inte botö adobai yædo concædi tī wodönoincade oodo inte badöincade önompo æmæmpoque go men- cæda incade ongöñömö adoyömö tæcæguedē nē cægömo imopa.

² “Minitö æbänö cæminii, ante do ēñēmopa. Edæ nangui pönī cædinque mīnitö wæntæye ināmaï inte ee cæminīpa. Mīnitö wiwa cædāni inānite Baa ante quēwēminīpa, ante do ēñēmopa. Ayæ Wængongui nänö nē da godongaimōni imōnīpa, ante nē änāni incæte ināmaï iñönānite mīnitö, Nāwangä ināni, ante ēñencæte ante apænte adinque, Tömēnāni babæ änānīpa, ante ēñente wæmīnitapa. ³ Mīnitö wæntæye ināmaï inte ee cæminī imīnīpa. Ayæ botö emōwo apænete beyænque wæwēminī incæte godömenque

godömenque cædinque mīnitō mīmōnē nangæ badāmaī īmīnīpa, ante do ēñēmopa.

4 “ ‘Incæte adoque pōnī mīni cædinō wīi waa abopa. Mīnitō edæ wīi wēēnēñedē bai ædæmō waadete pōnēmīni īmīnīpa, ante awædō.

5 Edæ mīnitō waa cædimīni īmīni incæte ñōwo wæætē wēnæ wēnæ cæmīni bamīni awædō. Mānīnō ante pōnēedāni. Mānīi mīni wēnæ wēnæ cædinō ante, Ancaa wæwente awædō, ante pōnente ñimpo cædinque mīnitō wēēnēñedē mīni waa cægāi bai adobāi cæte quēwēedāni āmopa.

Åmo ēñēninque mīnitō mīni wēnæ wēnæ cædinō ante wædāmaī īmīni adinque botō mīnitō weca pōmaimopa. Pōninque mīni yædo concædī tī wodōnoincade nänō ongōñōmō ongōñonte botō ö ænguimodō anguēnē. 6 Incæte adoque mīni cædinō guiquēnē waa abopa. Mīnitō edæ Nin-codaitaidi nāni ānāni nāni cædō ante adinque pīinte īmīnīpa. Botō adobāi tōmēnāni nāni cædō ante adinque pīinte īmopa.

7 “ ‘Wayōmō wayōmō incæ botō imote godongāmæ nāni pōnencabo inānite Wængonguī Önōwoca quīnō angāā, ante tōmengā nänō ānō ante nē ēamonca īmīni inte ēñēedāni. Wængonguī waa gönea iñōmō māniñōmō adowænque quēwenguiwæ pædiwæ iwæmpa. Tæi ēmonte nē gānā cædāni inānite botō iñōmō, Māniwæ inca cæncæmīnīmpa, ante pædæ godoncæboimpa, ante māninque āmopa,” ante Waocā nē ēñagaingā iñōmō botō imote apænegacāimpa.

Ætāmidōna iñōmō quēwēnāni inānite Itota nänō ānō

8 Ayæ adocā godömenque apænecantapa.

“Ætämidöna iñömö Wængongui ingante godongämæ nani pönencabo inänite nē aacä acæcäimpa, ante botö änö ante iimaï yewæmöe ämopa. ‘Tömää badönämaï iñedē botö Do Quëwengaimo imopa. Ayæ tömää iinque bayedē incæ botö Ayæ Pöni nē Quëwëmo incæboimpa. Botö nē wænimo incæ ñowo wæætē ñäni ömæmongaimo imopa.

9 “ ‘Minitö wæwëmini inte adobaï ömæpomini iminipa, ante botö do eñëmopa. Incæte minitö nö ëamini iminipa. Oodeoidi pancadäniya, Mönitö Wængongui ingante möni pönencabo imönipa, ante nē änäni incæte wii mänömaï inänipa. Tömënäni minitö iminite ancaa piinte babæ änewënäni inänipa, ante botö do eñëmopa. Mäninäni iñömö Tatäna ingante nani eñencabo inte mänömaï cädänipa töö. 10 Minitö quinö beyæ wæwencæ cæmini imini incæte guiñënämaï iedäni. Tatäna incæ, Æbänö cæminii, ante acæte ante cæcä beyænque waodäni pancaminiya iminite tee mönecädänimpa. Önompo tipæmpoga eönæ iñonte wæwenguimini iminipa. Iinque minitö mini wænguinque wæmini incæ cöwë pönëninque ædæmö cädäni. Mänömaï nē cæmini iinque botö, Mini cöwë quëwenguinta, ante poganta bai minitö iminite pönömo æmaimnipa.

11 “ ‘Wayömö wayömö incæ botö imote godongämæ nani pönencabo inänite Wængongui Önöwoca quinö angää, ante tömengä nänö änö ante nē ëamonca imini inte eñëedäni. Wadäni adopoque wæninque nani mempoga wænguimämo bai tæi ëmonte nē gänä cädäni iñömö wæætē mempoga wænämaï

incädänimpa,’ ante mäninque ämopa,” ante Waocä nē ēñagaingä iñömö botö imote apænegacäimpa.

Pedegämo iñömö quëwënäni inänite Itota nänö änö

¹² Ayæ adocä godömenque apænecantapa.

“Pedegämo iñömö Wængongui ingante godongämæ nani pönencabo inänite nē aacä acæcäimpa, ante botö änö ante iimaï yewæmoe ämopa. ‘Botö edæ yaëmë tipængaa waingamë engamë nææmo imopa.

¹³ “Ædönö quëwëminii, ante botö do ēñëmopa. Tatäna contaïmpa ongonte nänö aayömö adoyömö minitö quëwëmini imini incæte botö imo edæ ñimpo cädämaï quëwëmini iminipa. Mini quëwëñömö Tatäna adoyömö quëwengä ininque, Antipato edæ botö änö ante cöwë pönëninque ædæmö apænedongä iñongante mäniñömö quëwënäni tömengä ingante wænönäni wængantapa. Tömengä wæñedë incæ minitö botö imote edæ, Dicæ pönëmogaa, änämaï iminipa.

¹⁴ “ ‘Incæte pancaa mini cædinö wii waa abopa. Edæ pancaminiya docä Badäo nänö odömonte apænegainö ante ēñëwëmini awædö. Tömengä iñömö, Badaco godö cæcä beyænque idægoidi tee tëwate bai oda cæcädänimpa, ante cædinque adocä Badaco ingante odömonte apænegä ēñente cægacäimpa. Wadäni, Mönitö wængongui cængui impa, ante nani cönönï ante, Minitö cæedäni, ante Badaco iñömö idægoidi inänite odömonte apænegacäimpa. Ayæ onquiyænäni tönö godö towente cæedäni, ante

odömonte apænegacäimpa. ¹⁵ Ayæ pancaminiya adobaï Nincodaitaidi nãni odömonte apænedö ante ëñewëmini awædö. ¹⁶ Mänömaï beyæ mini wënæ wënæ cædinö ante, Ancaa wæwente awædö, ante pörente ñimpo cæedäni. Minitö mini wënæ wënæ cædinö ante wædämaï imini adinque botö wantæ iñonte minitö weca pömaïmopa. Pöninque tömënäni nãni odömonte apænedö ante në ëñewënäni iñönänite botö önöne incæ yaëmë ënedinque yædæ tadedinque guëadö guëa cæcæboimpa.

¹⁷ “ ‘Wayömö wayömö incæ botö imote godongämæ nãni pönencabo inänite Wængonguï Önöwoca quïnö angää, ante tömengä nänö änö ante në ëamonca imini inte ëñeedäni. Tæi ëmonte në gänä cædäni inänite cænguï mänää nãni angainö botö wë wodöni cænguï iñonte godömo ænte cæncædänimpa. Adodäni inänite adobaï dica näämæntaca godömo æncædänimpa. Wa ëmöwo ante pemöninque mänincaa yewæmote ingæimpa. Në ænänique mänïwo ëñënäni inänipa,’ ante mäninque ämopa,” ante Waocä në ëñagaingä iñömö botö imote apænegacäimpa.

Tiatida iñömö quëwënäni inänite Itota nänö änö

¹⁸ Ayæ adocä godömenque apænecantapa.

“Tiatida iñömö Wængonguï ingante godongämæ nãni pönencabo inänite në aacä acæcäimpa, ante botö änö ante iïmaï yewæmöe ämopa. ‘Botö edæ Wængonguï Wëmo inömo imopa. Botö awinca incæ gonga wo bæcote bai në ëmömo imopa. Botö önöwa incæ yaëmenta bodonte nãni änö bai ñäö bai në ëwabo imopa.

19 “ ‘Minitö æbänö cæminii, ante mīni waadete pönēnō ante mīni wede pönēnō ante wadāni inānite mīni waa cædō ante botō do ēñēmopa. Minitö wæntæye ināmaī inte ee cædinque godongāmæ cæmīni imīnīpa, ante ayæ, Wēenēñedē do waa cædimīni inte ñōwo godōmenque waa cæmīni imīnīpa, ante adobaī do ēñēmopa. ²⁰ Incæte adoque pōni mīni cædinō wīi waa abopa. Onquiyængä Etabete nē emongä iñömō edæ, Wængonguī beyæ nē apænebo, ante nāmā incæ nē angä ingante wido cædāmaī imīni inte wæætē tōmengä ingante ayæ godōmenque Ao ämīnīpa tōö. Iñæmpa tōmengä iñömō botō imote nē cædāni inānite nänö odōmonte apænedō beyænque oda cæte gocædānīmpa, ante cæcä beyæ tōmēnāni onquiyænāni tōnō godō towente cædānīpa. Wadāni, Mōnitō wængonguī cænguī impa, ante nāni cōnōni cænānīpa tōö. Mänōmaī cæcædānīmpa, ante māningä onquiyængä odōmonte apænecäīmpa.

21 “ ‘Tōmengä nänö towente cædimāmo ante, Botō wēnæ wēnæ cæbo inte ancaa wæwente awædō, ante pōnente wabänō ñimpo cæquingää, ante botō tōmengä ingante ee pānāmaī intabopa. Incæte tōmengä nänö wēnæ wēnæ cædō ante wædāmaī quēwengä ingampa. ²² Iñique botō, Tōmengä ingante cæbo beyænque wēnæ wēnæ bate wæwencæcäīmpa, ante cæcæboīmpa. Ayæ tōmengä nänö odōmonte apænedinō bai nē ēñente cædāni iñömō tōmengä tōnō nāni guēa godō mōwēninō ante, Mōnitō wēnæ wēnæ cæmōni inte ancaa wæwente awædō, ante pōnente ñimpo cædāmaī ināni iñique tōmēnāni

inänite adobaï botö cæbo beyænque nanguï wënæ wënæ bate wæwëmainänipa. ²³ Tömengä wënäni inänite wænömo wæncædänimpa. Ininque wayömö wayömö incæ botö imote godongämæ nani pönencabo tömancabodäniya iñömö, Botö incæ tömënäni nani mimöno tönö ocaidë, Æbänö pönënänii, ante nē eñëmo inömo imopa, ante eñencædänimpa. Ayæ minitö cædi bai ante adinque botö wæætë adobaï minitö tömämïni iminite cæcæboimpa.

²⁴ “ ‘Wamini pancaminiya guiquënë Tiatida iñömö quëwëmini inte mäningä onquiyängä nänö odömonte apænedö ante minitö nē pönënämaï iminipa. Ayæ Tatäna wë wodonte nänö angainö ante eñënämaï iminitapa. Ininque botö minitö iminite iïmaï ämopa. Minitö teëmë mongæncoo mongænte gote bai wädämaï incæminimpa, ante wadö ante änämaï incæboimpa. ²⁵ Wæætë botö ocæ ëmænte wæænganca minitö edæ do mïni pönënö ante ñimpo cædämaï iedäni. Mäninque ämopa.

²⁶ “ ‘Inguipoga iinque baganca ædänidö botö änö nē cædönäni inte tæï ëmonte nē gänä cædäni inänite botö pönö cæbo ate tömënäni nämä tæï piñænäni badinque tömämæ quëwënäni inänite nē änäni bacædänimpa. ²⁷ Botö Mæmpo botö imote pönö cæcä beyænque Awënë badinque nämä tæï piñænte inte nē ämo bai botö adobaï tömënäni inänite pönö cæbo beyænque awënëidi badinque aacædänimpa. Tæiyæ awënë tömengä nempo quëwënäni inänite aacä bai tömengä iñömö tömämæ quëwënäni inänite, iïmaï cæedäni,

ante aacæcäimpa. Dai inte bæte cængæmö tæi ænacä nancate bai cædinque tömengä adobaï wabæca wabæca quëwënäni inänite nanguï pante cæcæcäimpa. ²⁸ Mäninäni inänite botö adobaï wadaamö ñäo bayonte apäimö incæ godömo æncædänimpa.

²⁹ “ ‘Wayömö wayömö incæ botö imote godongämæ nani pönencabo inänite Wængonguï Önöwoca quinä angää, ante tömengä nänö änö ante nē ēamonca imini inte ēñēedäni,’ ante mäninque ämopa,” ante Waocä nē ēñagaingä iñömö botö imote apænegacäimpa.

3

Tadoditiidi inänite Itota nänö änö

¹ Ayæ adocä godömenque apænecantapa.

“Tadoditi iñömö Wængonguï ingante godongämæ nani pönencabo inänite nē aacä acæcäimpa, ante botö änö ante iimaï yewæmöe ämopa. ‘Wængonguï Önöwoca incæ önompo æmæmpoque go mēwoga önöwocaidi ewocadongä ingampa. Botö iñömö tömengä ingante nē ewocate quëwengaïmo inte nēmöidi önompo æmæmpoque go mēa ganca inäni nē næænte ingaïmo imopa.

“ ‘Ininque, Minitö æbänö cæminii, ante do ēñēmopa. Minitö müimini quëwëminipa, ante wadäni apænedäni incæte minitö wii waa cæte quëwëmini inte do wængainäni bai iminipa töö.

² Edæ, Botö Wængonguï ayongä mini cædinö wii eyepæ cæminipa, ante adinque botö, Ñäni ömæmöedäni, ante ämopa. Ñäni ömæmöinque

mīnitō, Ayæ mīnāni quēwēnāni incæ nē wæncæ cædāni bai badāni incæte tōmēnāni wænāmaī inte wæætē tæimō bacædānimpa, ante cædāni. ³ Mānōmaī beyæ, Quiēmē do ænimīni bai imīni, quiēmē ante do ēñēmīni, ante māninō ante wæætē adodō ante pōnēdāni. Pōnēnīque mīnitō māninō ante ēñente cædāni. Ayæ mīni wēnæ wēnæ cædinō ante, Ancaa wæwente awædō, ante pōnente ñimpo cædāni. Wæætē mīnitō wīi ñāni ömæmonte bai imīni ate wædinque botō incæ mīnitō weca awēmō nē ængā bai pōmaīmopa. Ayæ, Awēmō nē ængā æyedēnō ponguingāā, ante ēñēnāmaī ināni bai botō adobai mīnitō ēñēnāmaī iñōmīni mīnitō weca awēmō ponguimo apa quēwēmīni.

⁴ “ Incæte Tadoditi iñōmō mīni quēwencabo iñōmīnite pancadāniya tōmēnāni weocoo wentamō nāmōnāmaī bai iñināni inte nē waa cæte quēwēnānipa. Mānināni waa cæte quēwēnāni beyæ eyepæ inōnāni inte weocoo nāāmæntacoo mongænte botō miñæ gocædānimpa. ⁵ Nē tæi emonte gānā cædāni iñōmō adobai weocoo nāāmæntacoo mongæncædānimpa. Ayæ, Quēwenguīta, ante Wængonguī nānō yewæmongaintaa mānināni emōwo do yewæmōi iñinque botō cōwē wadæ cædāmaī incæboimpa. Wæætē botō Mæmpo Wængonguī weca ayæ tōmengā anquedoidi weca botō, iñināni botō miñæ gogaināni inānipa, ancæboimpa.

⁶ “ Wayōmō wayōmō incæ botō imote godongāmæ nāni pōnencabo inānite Wængonguī Önōwoca quīnō angāā, ante tōmengā nānō änō

ante nē ēamonca imini inte ēñēedāni, ante māninqe āmopa,” ante Waocā nē ēñagaingā iñömö botö imote apænegacäimpa.

Pidadedepiadi inänite Itota nänö änö

⁷ Ayæ adocä godömenque apænecantapa.

“Pidadedepia iñömö Wængongui ingante godongämæ nani pönencabo inänite nē aacä acæcäimpa, ante botö änö ante iimaï yewæmoe āmopa. ‘Botö edæ nē Tæiyæ Waëmö ingaimo imopa. Nö ante cægaimo inte botö docä Awënë Dabii nänö wi ænequi nē næængaimo imopa. Ininqe quinö odemö botö wi ænebo incæ mäninemö wacä ædö cæte tee mönequingää. Ayæ quinö odemö botö tee mönebo incæ mäninemö wacä ædö cæte wi ænequingää.

⁸ “ Minitö æbänö cæminii, ante do ēñēmopa. Minitö cæcæminimpa, ante botö odemö wi ænete bai cæbo aedāni. Æcänö mäninemö wæætē tee mönequingää. Edæ dæ angampa. Minitö wii tæi piñæmini imini incæte botö angainö ante ēñente cæmini inte botö emöwo ante, Dicæ ēñēmöniyaa, ante änämaï inimini iminipa. Botö do ēñēmopa.

⁹ Möni oodeocabo imöni incæ pancadāniya, Mönitö Wængongui ingante möni ēñencabo imönipa, änäni incæte inämaï inänipa. Wæætē tömēnāni iñömö babæ anewēnāni inänipa. Tatāna ingante nani ēñencabo inänipa töö. Botö godö cæbo ate adodāni minitö weca ponte minitö önöwa gäänē ædæ wææncædänimpa. Ayæ, Botö minitö iminite nē waadete pönengaimo imopa, ante botö godö odömömo ēñencædänimpa.

¹⁰ Minitö iminite, Ee cædinque wæntæye inämaï

iedäni, ante botö angainö ante eñente nē cædimini imini adinque botö wæætē mīnitō imīnite wææ aacæboimpa. Inguipoga quēwēnāni tōmānāni nāni wæwenguimāmo ancaa baquīnō anguēnē. Edæ Tatāna, Æbānō quēwēnāni, ante acæte ante cæcā ate nāni wæwēñedē botö iñömō, Mīnitō wæwēnāmaī incæmīnimpa, ante mīnitō imīnite wææ aacæboimpa.

11 “ ‘Botö oo ocæ emænte ponguimo imopa. Wængongui poganta nänö godonguinta, ante mīnitō imīnite godongä æncæmīnimpa. Māninta mīni ænguinta iñömō wacā ænāmaī incæcāimpa, ante mīnitō mīni entawēnō ante godōmenque godōmenque ñimpo cædāmaī iedāni. 12 Botö cæbo ate waodāni tæi emonte nē gānā cædāni iñömō tōmēmo Wængongui tæiyæ waēmō oncōnē wantæpiyæ quēwenguīnānidō anguēnē. Tōmēnāni Wængongui weca cōwē quēwente taodāmaī incædānimpa. Tōmēnāniya botö Wængongui emōwo yewæmoncæboimpa. Mīi Eedotadēē nāni añömō iñömō botö Wængongui nänö quēwēñömō iñonte māniī tōmengä nänö quēwēñömō incæ öönædē inō da pōnongä wæængæimpa. Māniī Wængongui nänö quēwēñömō emōwo botö adobaī tōmēnāniya yewæmoncæboimpa. Ayæ botö wawo botö ñōwo pemongaīwo adobaī tōmēnāniya yewæmoncæboimpa.

13 “ ‘Wayömō wayömō incæ botö imote godongāmæ nāni pōnencabo inānite Wængongui Önōwoca quīnō angää, ante tōmengä nänö änō ante nē eamonca imini inte eñēedāni,’ ante māninqe ämopa,” ante Waocā nē eñagaingä

iñömö botö imote apænegacäimpa.

Daoditeaidi inänite Itota nänö änö

¹⁴ Ayæ adocä godömenque apænecantapa.

“Daoditea iñömö Wængongui ingante godongämæ nani pönencabo inänite në aacä acæcäimpa, ante botö änö ante iimaï yewæmöe ämopa. ‘Botö emöwo Amëë, ante pemongaïmo inte botö cöwë, Näwangä impa, ante në cöwë ædæmö apænegaïmo imopa. Wëenëñedë Wængongui nänö badongäñedë mäniñedë botö tömengä tönö godongämæ badongaïmo beyænque tömengä nänö badongaincoo tömancoo Awënë badingue botö në ämo imopa.

¹⁵ “ ‘Minitö æbänö cæminii, ante do ëñëmopa. Yogui pæ bai inämaï imini incæte ocoi ämæ bai adobai inämaï iminipa töö. Iñæmpa yogui pæ bai iminipa diyæ waa aquimoo. Edæ ocoi ämæ bai iminipa diyæ waa aquimoo. ¹⁶ Minitö yogui pæ bai inämaï imini incæte ocoi ämæ bai inämaï imini inte wæætë wiï eyepæ cæmini inte gänë ämæ bai iminipa töö. Mänömaï beyæ botö edæ tömömo önönë towæ tänonte bai minitö iminite adobai wido cæcæ cæbo apa quëwëminii. ¹⁷ Minitö, Mönitö nanguï ëamöni imönipa, ante äminipa. Edæ, Tömëmöni mäincoo gæte da wëningue eyepæ ëamönipa, ante äminipa. Iñæmpa mäninö ante wapiticæ pönente äminipa. Minitö mini wæwënö incæ ëñënämaï iminipa töö. Minitö æbänö bate cæminii, ante adingue wadäni, Minitö wodi, ancædänimpa. Ömæpodäni bai imini inte minitö babetamönäni bai imini inte ömaadäni bai imini incæte, Mänömaï imönipa, ante ëñëminiyaa.

18 “ ‘Mänömaï beyæ botö, İmaï cæedäni, ante waadete ämopa. Botö pönö cæbo beyænque mînitö wæætë waa bate bai nanguï cæcæmînimpa, ämopa. Mänînö botö pönö cædö iñömö oodo gongapamö aca podonte ate waëmö oodo bate bai impa. İnînque mînitö, Mönitö nanguï ëamöni bacæmönimpa, ante cædinque botö weca ponte tömëmo oodo ante godonte æedäni. Ayæ, Ömaamöni inämaï incæmönimpa, ante guingo imönämaï incæmönimpa, ante mînitö botö weocoo näamæntacoo godonte ænte mongæedäni. Ayæ mînitö, Awinca waa acæimpa, ante cædinque tömëmo awinca cönömöimæ godonte ænînque cönömöedäni.

19 “ ‘Botö nê waadete pönënanî inänite botö pîinte ämo inte adobai pante cæbo imopa cæmîni. Mînitö nanguï cædinque mîni wënæ wënæ cædînö ante, Ancaa wæwente awædö, ante pönente ñimpo cæedäni. ²⁰ Èamonca ëñëedäni. Botö incæ odemö yabæ inö ongonte bai waomîni mîmöno a ongönînque, Wi ænequï, ante aa peyömo waocä æcämenque incæ ëñëînque odemö wi ænete botö imo, Pö guie, angä îînque botö iñömö edæ tömengä mîmöne pö guicæboimpa. Tömengä mîmö botö oncö bai iñonte botö tömengä tönö cænte bai cöwë quëwencæboimpa. Ayæ tömengä wæætë botö tönö cænte bai cöwë quëwencæcäimpa. ²¹ Botö tæï ëmonte nê gänä cægäimo inte botö Mæmpo nänö aacæ tæ contaimpaa tömengä tönö guëa tæ contagäimo bai nê tæï ëmonte nê gänä cædäni iñömö adobai botö tömëmo aacæ tæ contayömo

botö tönö godongämæ tæ contacädänimpa, ante ämo adopaa tæ contaquinäni.

22 “Wayömö wayömö incæ botö imote godongämæ nani pönencabo inänite Wængongui Önöwoca quinö angää, ante tömengä nänö änö ante tömënäni në éamonca imini inte ëñeedäni, ante mäninque ämopa,” ante Waocä në ëñagaingä iñömö botö imote apænegacäimpa.

4

Öönædë iñömö Wængongui ingante watapæ apænedäni

¹ Botö Wäömo inömo inte ayæ ate æmö ayömote öönædë inö odemö wi ænete atabopa. Todompeta nani ancadeca we öonte yedæ tē bai tedepämo täno botö ëñëninö iñömö ñowo wæætë adopämo botö imote iimaï äninque, “Iñömö pö æe. Æñömite botö, Ayæ ate quinö baquënë inguii, ante bitö imite edonque odömömo acæbiimpa,” angantapa.

² Mäninö ante äñongä Wængongui Önöwoca incæ botö imote bæi ongonte bai cæyongä botö wüimonte bai adinque iimaï atabopa. Öönædë inö Awënë tæ containpa ayömo adocanque mäniñömö tæ contacä atabopa. ³ Mäningä adoyömö në tæ contadongä iñömö dica ñäö bai émonca bai adobai émongä ingantapa. Aatape nani äninca bai codönadina nani äninca bai mäninca mencaa ñäö bai inca bai tömengä adobai émongä ingantapa. Awënë tæ containpa iñömö daimë dica bai etëmedada nani äninca émonca bai inte æidämæ waimë pöni gongæmënimpa.

⁴ Mänimpa Awënë nänö aacæ tæ containpa

waimpacoo bæinticoatodo ganca mänimpopacoo mäninömö godämæ a ongompapa. Adopacoo inömö nē aadāni nē Picænāni bæinticoatodo ganca mänimpodāni tæ contadinque näämæntacoo mongæninque poganta oodo inte badöinta da wencate a ongönānitapa. ⁵ Awënë tæ containpa inö näinte yædæ yædæ ta gote detæbo tæi tæi tē tēñonte yedæ pōni ānimpā. Ayæ Awënë tæ contayömö tæcætawē inö ti wodōnoincade önompo æmæmpoque go mencadea wocædöincadecoo a ongönimpā. Wængongui Önowoca incæ önompo æmæmpoque go mēwoga önowocaidi bai ewocadongä inte mänincadecoo bai ingampa.

⁶ Ayæ Awënë tæ containpaa tæcætawē inö adobai gäwapæntibæ bai inñonte awocawænta bai inimpā. Ayæ Awënë tæ containpa inömö miināni quēwēnāni mēnaa go mēnaa ināni godämæ a ongönānitapa. Mänināni inömö tæcætawē inö önöñabæ inö tömāo awinca emönāni atabopa. ⁷ Tānocā miingä quēwengä botö adingä inömö nēöo bai emongampa. Ayæ wacä miingä quēwengä botö adingä inömö wagada mæmpo bai emongampa. Wacä miingä quēwengä botö adingä inömö tömengä awinca waocä awinca bai emongampa. Ayæ tömangä miingä quēwengä botö adingä inömö guingämowæ pao pao gocä bai atabopa. ⁸ Mēa go mēa miināni quēwēnāni incæ adocanque adocanque önompo æmæmpoque go adoguēnepænque emænte quēwēnāni inānipā. Ayæ adodāni inte tömēnāni baonga godämæ tömanga nangui pōni awinca emonte ænömengadænguēnepæ incæ awinca adobai emönānipā. Mänināni edæ

itædē woyowotæ ñimpo cædämaï inte iïmaï ante ämotamïni änänipa.

“Bitö Tæiyæ Waëmö Awënë imidö, bitö Tæiyæ Waëmö Awënë imidö, ante ämönipa.

Wængonguï Awënë bitö adobique Tömää nē Cæbi inte

wëenëñedē do nē quëwengaïmi ïmi ñöwobi adobi inömi inte ayæ wantæpiyæ cöwë quëwencæbiimpa.”

Ante ämotamïni ante cöwë änänipa.

⁹ Awënë tæ contaimpaa nē tæ contadongä inte nē wantæpiyæ cöwë quëwengaingä ingante apænedinque mäa go mäa mïinäni quëwënäni iñömö iïmaï ante apænedänipa. Bitö ñäö ëmömi imipa, ante apænedinque tömënäni, Bitö imite waa amönipa. Mönitö bitö imi waa ate pönente apænemönipa, ante apænedänipa. ¹⁰ Mänömaï ante apæneyönäni nē aadäni nē Picænäni iñömö bæinticoatodo ganca mänimpodäni Awënë tæ contaimpaa nē tæ contadongä inte nē wantæpiyæ cöwë quëwengaingä weca ædæ wææninque tömengä ingante, Bitö Wængonguï Awënë imidö angüenë, ante watapæ apænedinque tömënäni poganta gä æncadinque Awënë tæ contaimpa gäänë cö cædinque iïmaï ante ämotamïni ante änänipa.

¹¹ “Bitö iñömö mönitö Wængonguï Awënë imidö, ämönipa. Bitö badöinënö, ante pönente ingaïmi inte öönædë ongönäni tönö inguipoga ongönäni tönö tömänäni inänite badongaïmi imipa.

Bitö wïi badömi bai tömänäni badongainäni quëwënämaï dæ ancædönänimpa.

Mänömaï beyæ bitö eyepæ inömi iñömite, Bitö ñäö
 emömidö angüenë, ante mönitö bitö imite
 waa amönipa.

Bitö nämä tæi piñænte nē cæbi imidö, ante bitö
 imite amönipa,”
 ante ämotamini ante änänipa.

5

Wængongui Codotedo yewæmöinta wi æmpocampa

¹ Ayæ Awenë nänö aacæ tæ containpaa nē
 tæ contacä iñömö tömengä önönempo tömempo
 incæ yewæmöinta dadi ompointa næængä
 atabopa. Mäninta tipäataa yewæmöinta impa.
 Adotaa yæwedeta iñömö guiñenca bai inte tee
 bædinta önompo æmæmpoque go mentaa inimpa.
² Ayæ Wængongui anquedo adocanque nē
 tæi emongaingä inte yedæ aa pecä atabopa.
 “Mäninta dadi ompointa wi æmpoquii, ante
 æcänö nö waa pöni inongä inte eyepæ inte tee
 bædedinta waa waa ænete wi æmpoquingäa,”
 angantapa. ³ Ayæ öönæde incæ inguipoga incæ
 tadömengadænga incæ cöwä ayönäni, Æcänö
 mäninta wi æmpoquingäa, cæncadenta inö æcänö
 aquingäa, ante edæ dæ angantapa. ⁴ Æcänö nö
 waa pöni inongä inte eyepæ inte dadi ompointaa
 wi æmpoquingäa iñömö edæ dæ angampa.
 Cæncadenta inö æcänö aquingäa ante dæ angampa,
 ante adinque nangui pöni Ca ca wætabopa. ⁵ Ca
 ca wæbo adinque nē aadäni nē Picænäni iñönäni
 adocanque nē Picængä incæ botö imo, “Wædämaï
 ie. Wæætë cöwä ae, angantapa. Adocanque
 onguiñængä iñömö mäninta wi æmpoquingä a

ongongampa. Awënë Dabii Pæingä incæ tömengä iñömö docä Oodaa pæinäni nāni cabo iñonte nē nēöö bai tæi emönongä inte nē gänä cæcä ingaingä ingampa. Tömengä iñömö edæ eyepæ inte tee bædedinta önompo æmæmpoque go mentaa wi æmpodique dadi ompointa wi æmpocæcäimpa,” angantapa.

⁶ Ayæ Wængonguï Codotedo nāni wænönāni nē wæningä bai ingä atabopa. Tömengä Awënë Wængonguï nänö aacæ tæ contayömö tæcæguedē ongöñongä miināni quëwënāni mēnaa go mēnaa ināni tönö nē aadāni nē Picænāni godāmæ a ongönāni atabopa. Tömengä iñömö önömoncawæncoo önompo æmæmpoque go mēwāa emoncadique awinca önompo æmæmpoque go mēmonga emongacäimpa. Edæ Wængonguï Önöwoca incæ önompo æmæmpoque go mēwoga önöwocaidi bai nänö ewocadö bai mänii awincacoo inānipa. Adodāni önöwocaidi inānite inguipoga da pönongä pönique tömēnāni inguipoga tömāmæ gote cæwodāni inānipa. ⁷ Ayæ Wængonguï Codotedo iñömö Awënë tæ contayömö pönique nē tæ contadongä önönempo tömempo inö dadi ompointa nänö nææninta ö ængantapa. ⁸ Tömengä mäninta ö ængä ate mēa go mēa miināni quëwënāni tönö nē aadāni nē Picænāni bæinticoatodo ganca mänimpodāni Wængonguï Codotedo weca ponte ædæ wæænānitapa. Iināni tömānāni ampoquï adapa nāni änö nææninque owæta oodo inte nāni badöinta oguï waaquï eyede enga næænānitapa. Wængonguï quinäni tömengä ingante nāni apænedö iñömö mänii oguï waaquï bai impa. ⁹ Tömēnāni mä äninque iimaï ante ämotamini ante

änänitapa.

“Bitö imite wænönäni nē wænimi inte bitö nö waa pönī inömi imipa.

Īninque bitö eyepæ inte dadi ompointaa ænte tee bædedinta wāa wāa ænete wi æmpoquimi imipa.

Waodäni näni cabo waodäni näni cabo incæ wadö näni tedecabo wadö näni tedecabo incæ wacä awënë näni cabo wacä awënë näni cabo incæ wabæca näni quëwencabo wabæca näni quëwencabo incæ waodäni inänite bitö,

Wængonguī quimīni bacæminimpa, ante cædinque nämä wepæ godonte ængabiimpa.

¹⁰ Bitö nempo quëwëninque tömënäni bitö tönö godongämæ aadäni bacædänimpa, ante badongabiimpa.

Mönö Wængonguī ingante cæcædänimpa, ante bitö pönö cæbi ate tömënäni,

Mönö Awënë Odeye Wængonguī qui, ante nē godönäni bagainäni inänipa.

Mäninäni edæ awënëidi badinque inguipoga quëwënäni inänite aacædänimpa.”

ante ämotamīni änänitapa.

¹¹ Ayæ ayömo Wængonguī anquedoidi iñömö bacoo inäni inte ämotamīni änäni eñëninque, Tömënäni æpodö miido ganca inänii, ante botö ædö cæte tee mampote eñënguimoo. Edæ miinäni quëwënäni tönö nē aadäni nē Picænäni tönö Awënë tæ contaimpa gäänē tæcæguedē ongöñönänite Wængonguī anquedoidi iñömö yabæque godämæ gongænte ongönänitapa. ¹² Mäniiñömö godämæ ongöninque tömënäni yedæ äninque iimaī ante ämotamīni änänitapa.

“Wængongui Codotedo ingante wænönäni nē
wæningä inte tömengä nö waa pöni inongä
inte eyepæ ingampa.

Tömengä edæ tæi piñængä ingänö anguënē.

Tömengä quincodö incæ tömancoo nē eacä inte
tömänö ante eñnongä ingänö anguënē.

Tömengä tæi piñænte inte tömää nänö cæinönö
cædongä ingampa.

Tömengä ingante, Bitö imite waa amönipa. Bitö ñäö
ëmömidö anguënē, ante bitö imite watapæ
apænemönipa,” änänitapa.

¹³ Ayæ Wængongui nänö badongainäni öönædē
quëwänäni incæ inguipoga quëwänäni incæ
tadömengadæ quëwänäni incæ gäwapæntibædē
quëwänäni incæ tömänäni adoyedē iimaï ante
ämotamini ante änäni eñentabopa.

“Awënē tæ contaimpaa nē tæ contadongä ingante
ayæ Wængongui Codotedo ingante tömäna
inate iimaï amönipa.

Minatö iminate watapæ amönipa. Minatö iminate
waa amönipa.

Minatö ñäö ëmöminadö anguënē. Minatö tæi
piñæmäna iminadö anguënē.

Wantæpiyæ iñonte mäninö ante cöwë
ancæmönimpa,” ante änänitapa.

¹⁴ Ante äñönäni mäa go mäa miinäni quëwänäni
adobäi, “Iimaï baquinö anguënē,” ante, “Amëë,”
änänitapa. Ayæ nē aadäni nē Picænäni iñömö ædæ
wææninqe watapæ änänitapa.

6

Tee bædinta önompo æmæmpoque go mentaa

¹ Ayæ Wængongui Codotedo iñömö tee bædinta önompo æmæmpoque go mentaa incæ yewæmöinta dadi ompointa tee bædedinta tänota wi æmpoyongä atabopa. Ayæ mäa go mäa miinäni quëwënäni incæ adocanque iñömö tömengä nänö tedepämo detæbo të bai inte botö imote, “Pöe,” ante yedæ angä eñentabopa. ² Tæcæ ayömo cabayo näämænta eñacä do a ongongä atabopa. Cabayo inte nē tæ contacä iñömö to piyæncaimpa næængantapa. Tömengä iñömö wadäni inänite guëadö guëa cæte tæi emongä inte gänä cædongä iñongante Awënë poganta pönönäni æninqe tömengä wæætë guëadö guëa cæcæte ante cabayo mongænte gocantapa.

³ Ayæ Wængongui Codotedo wæætë tee bædedinta wataa wi æmpoyongante mäa go mäa miinäni quëwënäni incæ wacä iñömö botö imote, “Pöe,” angä eñentabopa. ⁴ Ayæ wacä cabayo opatawæ gonga emö bai eñacä pongantapa. Waodäni incæ wacä ingä wacä ingä wænoncædänimpa, ante cædinqe Wængongui godö angä beyænque cabayo inte nē tæ contacä iñömö, Inguipoga quëwënäni piyænë cædämaï incædänimpa, ante nē cæcä bacantapa. Ayæ, tömengä ingante ñænæ yaëmë bai pönönäni ængantapa.

⁵ Ayæ Wængongui Codotedo wæætë tee bædedinta wataa wi æmpoyongante mäa go mäa miinäni quëwënäni incæ ayængä iñömö botö imote, “Pöe,” angä eñentabopa. Tæcæ ayömo cabayo wentamö eñacä do a ongongä atabopa. Cabayo inte nē tæ contacä iñömö tee manguï önönempe næængä ingantapa. ⁶ Ayæ mäa go mäa miinäni quëwënäni weca tedepämo bai eñeñömo,

“Todigomö tönö tebadamö nāni cænguimö, ante nangui nāni godonte æimö impa, ancæte ante iimai angä eñentabopa. Tömää itæde cædāni ate nāni cæganca beyæ todigomö mēa diboda pōni tee mangui ganca māninqe godonte æncædānimpa. Adobai tömää itæde cædāni ate nāni cæganca beyæ tebadamö önompo æmæmpoqe go adoque diboda tee mangui ganca māninqe godonte æncædānimpa. Ayæ oginguipæ ante odibomö nāni ämö eyepæ pæcæimpa, ante ee aedāni. Biinömæ ante yowe eyepæ pæcæimpa, ante ee aedāni.”

⁷ Ayæ Wængongui Codotedo wæætē tee bædedinta wataa wi æmpoyongante mēa go mēa miināni quēwēnāni incæ tōmangä iñömö botö imote, “Pöe,” angä eñentabopa. ⁸ Tæcæ ayömö cabayo nāmēnāa eñacā do a ongongä atabopa. Cabayo inte nē tæ contacā iñömö tōmengä emōwo, Nē Wænöinengä, ante pemonte emongantapa. Waodāni nāni wænte ongöñömö awēnē tōmengä miñæ tee empo pongantapa. Wængongui Codotedo pönö cæcā beyænque tōmēna inguipoga quēwēnāni inānite adinque mēnaa go mēnaa iñönānite adocanque ingante wænöninque ayæ wadāni mēnaa go mēnaa iñönānite adocanque ingante wænöninque nangui ināni inānite nē wænöna badatapa. Tōmēna pancadāniya inānite yaēmenca nē wænöna badatapa. Ayæ tōmēna godö cæda beyænque waodāni pancadāniya gue ænente nāni wænguimāmo pō wæncædānimpa. Ayæ tōmēna godö cæda beyænque pancadāniya quingæ wodonte nāni wænguimāmo pō wæncædānimpa. Ayæ tōmēna godö cæda beyænque pancadāniya

babæidi wænönäni beyæ wæncædänimpa.

⁹ Ayæ Wængongui Codotedo wæætë tee bædedinta wataa wi æmpoyongante botö, Wængongui qui, ante nani wëmonca iya täimoga ænömengadæ inö waodäni önöwocaidi owodäni atabopa. Mäninäni Wængongui nänö angainö ante nē ēñente cædäni inte, Itota mönö Codito inongä ingampa, ante, Nö ante impa, ante apænedäni beyæ tömënäni inänite wænönäni wængainäni inänitapa. ¹⁰ Adodäni yedæ äninque iimaï änänitapa, “Awënë Wængongui bitö tömänäni inänite nē Aabi inömi imipa. Edæ tæiyæ waëmö inömi inte bitö nē nö ante apænebi imipa. İninque inguipoga quëwënäni mönitö imönite nē wænöninäni inänite æiquedö apænte anguimii. Ayæ mönitö wepæ möni gowepæ beyæ ante tömënäni inänite æiquedö panguimii ämönipa.” ¹¹ Mäninäni tömänäni inänite tömengä doyæncoo näämæntacoo pönongä ænänitapa. Æñönänite, “Wædænque ayæ ee ongödäni,” äninque tömengä, “Minitö iminite do wænönäni wæmïni bai wadäni mïni tönïñadäni ayæ müinäni quëwënäni inte mïnitö tönö Wængongui ingante nē cædönäni inänite wænoncædänimpa. İinäni inänite wænunguënënäni inänipa, ante Wængongui nänö änö bai tömënäni inänite iinque nani wænonganca ee ongödäni,” ämopa, ante angantapa.

¹² Ayæ Wængongui Codotedo wæætë tee bædedinta wataa wi æmpoyongä atabopa. Mänïñedë tæimö goinque ocæ ocæ gotimpa. Waodäni tömënäni guiidengä wængä ate wæwente beyænque wentamoncoo mongænäni bai nænque

iñontobæ adobaï wentamö pönï emö batimpa. Apäicä pæibo iñedē incæ wepæ bai opatawæ emö batimpa. ¹³ Ayæ nēmoncoo öönæde inö owocoo iñömö wææ tæ ayæ waa wææ tæ ayæ waa wææ tæ inguipoga iñömö tæ wææningue iigowæmö ayæ icadāmaï iñonte nanguï woboyæ pæmæñonte woga woga cædinque tæ wæænte bai adobaï tæ wæænänitapa. ¹⁴ Ayæ öönæ incæ mincayonta dadi ompote bai dæ ä batimpa. Ayæ tömanquidi tömäa wää tēiwænē iñontobæ wayömö gote dæ ä bai inimpa.

¹⁵ Ayæ awënë odeyeidi incæ ñænænäni inte nē cædönäni incæ tontadoidi awënëidi incæ nē nanguï eadäni incæ tæï piñænte cædäni incæ tömënäni guiñente badänitapa. Ayæ awënë nē godonte æningä beyænque nē cæte quëwënäni incæ nämanque cæte quëwënäni incæ tömënäni tömänäni guiñente badänitapa. Guiñente badinque tömënäni änanquidi æite ontatodē iñömö wē womönänitapa. Ayæ onquiyaboga dicabocodē tæcæguedē go guiite wē womönänitapa. ¹⁶ Ayæ waodäni inänite aa pete bai tömënäni, “Onquiyaboidi eñeedäni, dicaboidi eñeedäni, Awënë tæ contaïmpaa nē tæ contadongä mönitö imönite adāmaï incæcäïmpa, ante cædinque minitö mönitonga tæ wæænte beocaedäni,” ante aa pedänitapa. Ayæ, “Wængonguï Codotedo ænguï badinque mönitö imönite pänāmaï incæcäïmpa, ante cædinque tæ wæænte beocaedäni,” ante aa pedänitapa. ¹⁷ “Edæ tömëna nāna nanguï pönï ænguï baquïönæ do ba ininque æcänö ayæ quëwenguingäa. Edæ dæ ä inguïnö anguënē,” ante wædänitapa.

7

Wængongui anquedo nänö në yewæmöinäni

¹ Ayæ ate Wængongui anquedoidi mënaa go mënaa ongönäni atabopa. Adocanque yædæcapæ inö ongöñongante wacä yæwainö ongöñongante wacä imatæ betamonca inö ongöñongante tömangä æmataæ betamonca inö a ongongantapa. İninque, Woboyæ mëa go mëa iñonte mönö a ongönö inö inguipoga go pæmænämaï, ante cædınque cædänitapa. Tömänäni ömaa iñömö incæ gäwapæntibæ iñömö incæ adobai tömäo awæncoo pæyömö incæ woboyæ pæmænämaï ingæimpa, ante cædänitapa. ² Wacä anquedo nænque tamönö inö pongä atabopa. Tömengä Wængongui në Quëwengaingä nänö yewæmöingö nææante pongä atabopa. Wængongui anquedoidi mënaa go mënaa inäni iñömö inguipoga incæ gäwapæntibæ incæ wo ewente cæcædänimpa, ante cædınque Wængongui godö cæcä beyænque tæi piñænäni badänitapa. Mäninäni inänite Wængongui anquedo ñowo pöningä yedæ aa pecantapa. ³ “Ee ongöedäni. Edæ minitö inguipoga incæ gäwapæntibæ incæ awæncoo incæ ee wo ewenämaï iñöminite mönitö Wængongui ingante në cædäni näni önönemö inö tömengä nänö yewæmöi ante täno yewæmoncæmönimpa. Yewæmömöni ate minitö mäniñedë ate wo ewente cædäni.”

⁴ Ayæ yewæmöinäni æpodänidö badänitapa, ante apænecä ëñentabopa. Tömänäni yewæmöinäni inte tiento coadenta i coatodo müido ganca inänitapa. Idægoidi näni cabo tipæmpoga go mencabodäniya iñönänite iïmaï yewæmöinäni badänitapa.

5 Wëenëñedë Oodaa wodi pæināni nāni cabo iñönānite nē yewæmōināni iñömō tipæmpoga go mēa mīido ganca inānitapa.

Ayæ Odobeë wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ Gado wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

6 Ayæ Atedo wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ Nempatadii wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ Mānatee wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

7 Ayæ Tīmeönö wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ Debii wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ Itacado wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

8 Ayæ Tabodöo wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ Ootee wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ adobaï Beencaminö wodi pæināni nāni cabo
iñönānite nē yewæmōināni wææ tipæmpoga
go mēa mīdo ganca inānitapa.

Tæiyænāni näämæntacoo mongænte a ongöninque

⁹ Ayæ ate wæætē ayömō tæiyænāni ināni a
ongönāni atabopa. Æpodānidō ināni, ante æcānō
tee mampote anguingā. Mānināni wabæca
nāni quēwencabo wabæca nāni quēwencabo inte
tæiyænāni incæ waodāni nāni cabo waodāni nāni
cabo inte tæiyænāni incæ wacā awēnē nāni cabo
wacā awēnē nāni cabo inte tæiyænāni incæ wadō
nāni tedecabo wadō nāni tedecabo inte tæiyænāni
incæ mănōmaï inönāni inte ongönānitapa. Iināni
iñömō näämænta weocoo doyæncoo mongænāni
inte yædēmæmāa önönempo nææninque Awēnē
nānō aacæ tæ contaimpa gäänē ongöninque
Wængonguï Codotedo weca a ongönānitapa. ¹⁰ Ayæ
tömēnāni yedæ äninque iïmaï änānitapa.

“Mönö Wængonguï iñömō tömengä nänö aacæ tæ
contaimpaa nē tæ contacā inongä inte
tömengä adocä mönō imonte, Quēwencæminimpa,
ante nē Ængä inongä ingampa.

Ayæ Wængonguï Codotedo adobaï mönō imonte,
Quēwencæminimpa, ante nē Ængä inongä
ingampa,” änānitapa.

¹¹ Nē aadāni nē Picænāni tönö mēa go mēa
mīnāni quēwēnāni Awēnē tæ contaimpa
gäänē ongöñönānite Wængonguï anquedoidi
tömānāni iñömō yabæ inö godāmæ ongönānitapa.
Wængonguï nänö aacæ tæ contayömō gäänē
guidömēmæ ædæ wææninque tömēnāni
Wængonguï ingante, Bitö Wængonguï Awēnē imidö

anguënë, ante watapæ apænedänitapa. ¹² Ayæ änänitapa.

“Amëë. Mönö Wængongui ingante watapæ apænemönipa.

Ayæ tömengä ñäö ëmongänö anguënë. Tömengä tömänö ante ëñëngä ingänö anguënë.

Tömengä ingante waa adinque mönitö tömengä ingante waa ate pönente apænemönipa.

Ayæ tömengä tæi piñængä ingänö anguënë.

Tömengä tæi piñængä inte tömää nänö cæinënö cædongä ingampa.

Wantæpiyæ iñonte cöwë mäninö ante ancæmönimpa.

Mänömaï baquïnö anguënë, ante, Amëë,” änänitapa.

¹³ Ayæ në aadäni në Picænäni incæ adocanque botö imo äninque, “Iinäni näämæntacoo doyæncoo në mongænäni iñömö æmönänidö inänitawo. Edæ ædönö quëwëninäni inte pönänitawo,” angantapa.

¹⁴ Äñongante botö tömengä ingante, “Awënë bitö tömëmi do ëñëmipa,” antabopa. Äñömote tömengä wæætë, “Mäninäni nanguï näni wæwengaimämo iinque baganca incæ ayæ miinäni quëwënäni inänipa. Edæ tömënäni weocoo doyæncoo, Waëmö pönï bacæimpa, ante Wængongui Codotedo wepænë yamongainäni inänipa,” ante në aacä në Picængä apænecantapa.

¹⁵ Ayæ adocä godömenque apænecantapa.

“Mänömaï beyæ Wængongui nänö aacæ tæ contaimpa gäänë a ongöninque tömënäni

itædē incæ woyowotæ incæ Wængongui oncö
tæiyæ waemö oncönē tömengä ingante cöwē
cædänipa.

Īninque oncontai bai tömēnāni wænömēnæca wo
cæcä bai cædinque mänimpaa nē tæ conta-
dongä iñömö

tömēnāni inänite ante wææ aacæcäimpa.

¹⁶ Tömēnāni cöwē gue ænēnāmaï tepæ gæwænāmaï
incædänimpa.

Nænque tömēnāniya ti nāwānāmaï i ĩninque
tömēnāni gōnāmaï incædänimpa.

Quiēmē ocoi ä beyænque tömēnāni gonte ināmaï
inguinānidö anguēnē.

¹⁷ Edæ Wængongui Codotedo Wængongui nänö
aacæ tæ contayömö gäänē nē a ongongä
iñömö

tömengä iñömö mänināni näämæntacoo nē
mongænāni inänite nē aacä incæcäimpa.

Tömengä edæ tömēnāni inänite quēwenguimæ
tapæñömö iñömö ænte mäocä goquināni.

Ayæ Wængongui tömēnāni wēñapæ nāni tamonte
wædi tömāmæ wadæ cæmoncæcäimpa,” an-
gantapa.

8

Tee bædedinta tömanta wi æmpocampa

¹ Ayæ Wængongui Codotedo tee bædedinta
tömanta wi æmpoyongante öönædē iñömö mēedia
ooda ganca nōwæ ongonte batimpa. ² Ayæ
anquedoidi önompo æmæmpoque go mēa ganca
ināni Wængongui weca nē a ongōnāni inänite
atabopa. Mänināni inänite tömengä todompeta
nāni ancade önompo æmæmpoque go mencadea

ganca pædæ godongä ænänitapa. ³ Ayæ wacä anquedo iñömö ogui waaquï iya täincade oodo inte nani badöincade nææninqe, Wængongui quï, ante nani iya täimpa gäänë ponte a ongongantapa. Mänimpa oodo inte nani badöimpa Wængongui nänö aacæ tæ contaimpa gäänë ongönimpa. Ayæ, Wængongui quinäni tömengä ingante apæneyönäni bitö ogui waaquï tancæbiimpa, ante cædinque adocä anquedo ingante wacä pöninqe nanguï ogui waaquï godongä ængantapa. ⁴ Ænte önompo næænte ogui waaquï iya tangä ininqe tæëmämämo Wængongui weca æipämoyedë Wængongui quinäni tömengä ingante nani apænepämo guëa adoyömö æipämotimpa. ⁵ Ayæ adocä anquedo iñömö ogui waaquï iya täincade æninqe iya täimoga gonga ænte eyede wëninqe inguipoga iñömö wææntodongantapa. Wææntdongä ate detæbo tæi tæi tæ goyö yedæ pönï änimpa. Yædæ yædæ näinimpa. Ayæ goinqe gotimpa.

Todompeta nani ancade

⁶ Ayæ Wængongui anquedoidi önompo æmæmpoque go mäa ganca inäni todompeta nani ancade önompo æmæmpoque go mencadea ganca në nææinäni inte todompeta önöne gö cædedinque we we öoncæ cædänitapa.

⁷ Wængongui anquedo tänocä iñömö tömengä todompeta inte we we öongä ate yoguica gonga tönö wepæ adoyömö wempodente bai inguipoga iñömö tæ tæ wæænimpa. Tæ tæ wææ ate inguipoga iñömö pancabaa nanguï ömæ iñömö gonte batimpa. Awæncoo iñömö pancacooga

incæ adobaï nanguï incoo gonte wænimpä. Gaguimæncoo iñömö tömancoo gonte batimpa.

⁸ Wængonguï anquedo ayængä iñömö tömengä todompeta inte we we öongä ate ñænæ onquiyabo emö bai gonga bæcodote bai iñonte wææntodönäni gäwapæntibaa tæi tæi guitimpa. Tæi tæi guï ate gäwapæntibæ iñömö pancatibaa incæ nanguï pöni æpæ iñömö wepæ batimpa. ⁹ Ayæ gäwapæntibæ cæncadëmæ inö quëwënäni iñömö pancadäniya incæ nanguï inäni wænänitapa. Ayæ ñænæ wipocoo pancacooga incæ nanguï wo cæwodincoo iñömö wo ewente guitimpa.

¹⁰ Wængonguï anquedo ayængä iñömö tömengä todompeta inte we we öongä ate ñænæ nëmö iñömö cadentato tica wodönote bai öönæde inö owodëmö incæ tæ wææninqe öoncooga iñömö pancacooga incæ nanguï æpænë iñömö tæi tæi guitimpa. Æpæ tayömö adobaï cæncadëmæ inö tæi tæi guitimpa ¹¹ Mäninëmö emöwo iñömö, Ti Nänëmö, ante näni änëmö impa. Nëmö tæi guiyonte nanguï æpæ iñömö moncapæ bai ti nämæ batimpa. Waodäni tæiyænäni iñömö imæ ti nämæ bagaimæ bete wænänitapa.

¹² Wængonguï anquedo ayængä iñömö tömengä todompeta inte we we öongä ate nænque pancayömonga tente ba ate apäicä adobaï pancayömonga tente ba adinqe näna apäidinö iñömö pancaa wëmö batimpa. Nëmöncoo iñömö pancadäniya incæ nanguï inäni wo ewente badäni ate näni apäidinö iñömö pancaa wëmö batimpa. Itæde iñonte tipæmpoga go mëa ooda ganca iñö mëa go mëa ooda ganca nænque ñäö apäidämaï inimpa. Ayæ woyowotæ iñonte tipæmpoga go mëa

ooda ganca iñö mäa go mäa ooda ganca apäicä tönö nēmoncoo apäidämaï inänitapa.

¹³ Ayæ ayömote guingämöwæ öönæde gämænö pao pao godinque iïmaï ante aa pecä eñentabopa. “Inguipoga quēwēnāni nāni wæquinque. Nāni wæquinque. Nāni wæquinque impa, angantapa. Edæ Wængonguï anquedoidi mēnaa go adocanque ināni inte tōmēnāni todompeta inte we we öoncæ cædāni beyænque inguipoga quēwēnāni iñömö nanguï pōni wæwenguïnāni bacædānimpa,” ante guingämöwæ angantapa.

9

¹ Wængonguï anquedo ayængä iñömö tōmengä todompeta inte we we öongä ate wa nēmö öönæde inö owodinque inguipoga tæ wæængainēmö ongö atabopa. Māniï nēmö ingante tadōmengadænguipo ontatodē wi ænequï godonte inimpa. ² Wi ænequï æninque ontatodē wi ænecä ate tēemancoo ta æitimpa. Māniï tēemancoo ñænæ gongapamö tēemancoo bai inimpa. İinque iï tēemancoo tadōmengadænguipo ontatodē ta æiyonte nænque tönö öönæ wentamö pōni badaimpa. ³ Tēemancodē inö ñāwāi ta pōninque inguipoga iñömö wææñōnānite wacä godö cæcä beyænque tōmēnāni tæimö badinque emēne inguipoga quēwēnāni bai tæ guidāni badānitapa. ⁴ Ayæ tōmēnāni inānite, Inguipoga gaguimæncoo incæ gæpæñabocoo incæ awæncoo incæ pæcoo wo ewēnāmaï iedāni. Wæætē waodānique önönemö inö Wængonguï nänö yewæmōi inte nē yewæmōnāmaï ingaināni inānite adinque mīnitö tōmēnāni inānite godö cæmīni beyænque nantate

wæcæðänimpa, ante wacä angantapa. ⁵ Ayæ ñäwäiidi inänite edæ, Wænöedäni, änämaï ingä inte tömengä, Minitö wæætë tömënäni inänite önompo æmæmpoque apäicä ganca cæmïni beyæ nanguï pöni wæwencæðänimpa, angantapa. Ìinque emëñe tæ gui waocä nantate wæcä bai tömënäni nanguï pöni nantate wæwënäni inänitapa.

⁶ Mänïñedë waodäni, Æbänö cæte wænguïmoo, ante ancaa cædinque wænämaï incæðänimpa. Wæinëmönipa, ante änäni incæte ædö cæte wæmainäni.

⁷ Ayæ ñäwäiidi iñömö tontadoidi cabayoidi guëadö guëa cæte në godäni bai adobai emönänitapa. Tömënäni ocaboga awënë poganta oodo inte badöninta bai wencadänitapa. Ayæ mäninäni awinca iñömö waodäni awinca bai emönänitapa. ⁸ Tömënäni ocaguï iñömö onquiyængä ocaguï bai encadinque tömënäni bagacoo iñömö nööö бага bai engadänitapa. ⁹ Tömënäni tæcætawë inö tæineta inte badöinta bai wææ mongænänitapa. Ayæ tontadoidi guëadö guëa wænoncæte ante cædinque änäni ate cabayoidi pogodo gote awoto bai wëä pönonte nanguï pöni ä bai ñäwäiidi iñömö adobai önonguënepæ pao pao godinque ämæ godänitapa. ¹⁰ Tömënäni önömiñæ incæ emëñe önömiñæmpa bai emiñænänitapa. Tömënäni nani tæi piñæmämo önömiñæ inö emiñænäni inte önompo æmæmpoque apäicä ganca godö cæðäni beyæ waodäni nanguï pöni wæwënänitapa. ¹¹ Mänï ñäwäiidi iñömö awënë odeye ingante ëñente quëwënänitapa. Mäningä tömënäni awënë iñömö tadömengadænguipo iñömö quëwënäni

inänite nē aacä anquedo inongä inte tömengä emöwo ebedeo tededö, Abadoö, nāni äwo i ayæ, Nē Wo Ewengä, ante emongä ininque guidiego tededö, Apodiö, ante pemönänipa.

¹² Täno nāni wæquinque do iinque batimpa. Incæte godömenque mempoga ganca nanguï pönï nāni wæquinque ayæ baquïnö angüenē.

¹³ Wængonguï anquedo ayængä iñömö tömengä todompeta inte we we öongä ate tedepämo tēñö eñentabopa. Oguï waquï iya täimpa oodo inte badöimpa Wængonguï weca mæ ongompa. Mänimoga önömoncawæ bai mēa go mēa mæ ongöñömö mänïñömö tedepämo tēñö eñentabopa.

¹⁴ Wængonguï anquedo ayængä todompeta nē næængä ingante iimaï angantapa. “Ñænæ önonga Eopadatedö nāni änonga iñömö anquedoidi mēnaa go mēnaa ināni iñömö nē ñä cæyænināni inänite bitö ñimpo cæe,” angantapa. ¹⁵ Edæ mänināni anquedoidi mēnaa go mēnaa ināni iñömö tömēnāni mäninēpo iinque ba ate mänii apäicä iñonte mänionæ incæ mänii ooda iñonte dobæ nāni cæquinque ante a ongöñönänite iimaï angantapa. Waodāni tömänāni iñömö mencabodāniya go adocabodānique quēwēñönāni adocabodānique inänite minitö wænoncæminimpa, angantapa. Ayæ ñowo tömēnāni inänite ñimpo cæcä ate tömēnāni wænoncæte ante tao godänitapa. ¹⁶ Ayæ tontadoidi iñömö cabayo mongæināni ināni æpodänidö ināni, ante tee mampote dootiento miñöo ganca inänitapa. Mänimpodāni inänipa, ante eñentabopa.

¹⁷ Botö wüimonte bai ayömo cabayoidi tönö nē mongæināni iñömö iimaï emönāni atabopa. Cabayo nē mongæināni iñömö tæcætawē inö tæineta nāni

wææ mongæntacoo pancataa opatawæ gonga gonte bai emontapa. Pancataa wentamö emontapa. Pancataa atopode nani ä bai wiñadæ emö bai emontapa. Cabayoidi ocabo iñömö neöo ocabo bai encadänitapa. Tömänäni önöne inö gonga tönö täämä tönö atopode nani öo waadö tadedänitapa. ¹⁸ Mänii gonga tönö täämä tönö atopode iñömö mämämoque go adopämoque nani wænömämocoo nē tadedäni inte cabayoidi iñömö waodäni tömänäni mencabodäniya go adocabodänique quēwēñönäni adocabodänique inänite wænönäni wænänitapa. ¹⁹ Mäninäni cabayoidi tömänäni önöne inte tæi piñænte wænöninque adobai tömänäni önömiñæ inte tæi piñænte wænönänipa. Edæ tömänäni önömiñæ iñömö tæntæ ocabo bai emiñænäni inte waodäni inänite pocænäni wænänitapa.

²⁰ Mänimämo wodonte nani wængaimämocoo beyæ ayæ wænämäi quēwänäni inte wæwänäni incæte tömänäni nani wænæ wænæ cægainö ante, Ancaa wæwente awædö, ante pönänämäi inäni inte ñimpo cädämaï inänitapa. Wæætē oodo inte padata inte bodonte inte dica inte awæmpa inte tömänäni nani badonte cönönincoo iñömö adämaï incoo incæte eñänämäi incoo incæte dao dao godämaï incoo incæte tömänäni, Mönitö wængonguïdi inänipa, ante ædæ wæænte apænedinque ñimpo cädämaï inänitapa. Ayæ adobai wænæidi inänite ædæ wææninque, Minitö mönitö wængonguïdi iminidö anguënë, ante ñimpo cädämaï inte apænedänitapa. ²¹ Ayæ mäninäni godömenque waodäni inänite püinte wænönäni inte tömänäni müi bete yewænäni inänipa. Nänöogægä inämäi

iñongante towente cædonäni inte tömënäni awëmö ö æñäni inänipa. Mänömaï godömenque cædinque tömënäni nani wënæ wënæ cægainö ante, Ancaa wæwente awædö, ante pönënämaï inäni inte ñimpo cædämaï inänitapa.

10

Wængonguï anquedo dadi ompointa guiyanta næængä

¹ Ayæ wacä anquedo në tæï emongä inte öönædë inö wæængä atabopa. Tömengä weocoo mongænte bai boguïmancodé pöninge tömengä ocaboga tæcædæca inö daimë godämæ owotapa. Tömengä awinca incæ nænque bai apäidinque tömengä önömënë incæ cobacadewæ gonga gonte emö bai emënegä ingantapa. ² Tömengä önönempo inö dadi ompointa ininta nani wi æmpodinta guiyanta næængä ingantapa. Tömengä önöwa tömëwa gäwapæntibaa cö cæwadinque tömengä dipæwa guiquënë ömaa cö cæwacantapa. ³ Mänömaï cö cæwadinque tömengä nëöö ii pepa bai nanguï pöni yedæ aa pecantapa. Aa peyongä detæbo önompo æmæmpoque go mëa ganca wæætë tæï tëninge tededänitapa. ⁴ Detæbo önompo æmæmpoque go mëa ganca inäni iñömö tededäni eñëninge botö yewæmoncæ cætabopa. Tæcæ yewæmoncæ cæyömo öönædë inö tedepämo iïmaï ante tedecä eñëntabopa. “Iñæmpa önompo æmæmpoque go mëa detæbo nani tededö æbänö ante tededänii, ante wii eñenguï i inique bitö yewæmönämaï ie,” angantapa.

⁵ Wængonguï anquedo botö adingä iñömö gäwapæntibaa tönö ömaa në a ongongä iñömö

tömengä önompo tömempo öönädē inö pædæ æmpocantapa. ⁶ Tömengä tömempo pædæ æmpodinique, Wængongui ēñēñongä botö änö ante nöingä baquinö anguēnē, ante iimaï angantapa. Edæ nē wantæpiyæ cōwē quēwengaingä inte öönädē tömää inguipoga tömää gāwapæntibæ tömää badöinique tömengä adobai öönädē owodäni tömänäni inguipoga quēwēnāni tömänäni gāwapāa quingänö owodäni tömänäni inānite nē badongaingä inte tömengä emōwo apænedinique, Botö apænedö nöingä baquinö anguēnē, ante nē apæneca iñömö, “Mönö ee ongöñedē do iinque batimpa, angantapa. ⁷ Edæ Wængongui anquedo tömangä pönī iñömö tömengä todompeta we we öoncæ cæyongante Wængongui nänö cæinēnö ante wē wodonte bai nänö angainö ante ñöwo iinque cæcæcäimpa. Wængongui ingante nē cægaināni tömengä beyæ nē apænegaināni iñönānite mäninö nänö cæinēnö ante do apænegaingä inte Wængongui mäninö bai ñöwo iinque cæcæcäimpa,” angantapa.

⁸ Ayæ öönädē inö tedepämo adopämo do botö ēñēnö ñöwo wæætē botö imote iimaï angä ēñentabopa. “Wængongui anquedo nē gāwapæntibaa tönö ömaa iñömö a ongongä weca godinique bitö tömengä önönempo dadi ompointa ininta nāni wi æmpodinta nänö nææininta æe,” angantapa. ⁹ Angä ēñēinique Wængongui anquedo weca godinique botö tömengä ingante, Dadi ompointa guiyanta pönömi æmoe, ante añömo tömengä wæætē botö imo, “Æe. Æinique cæe. Bitö önöne da wēneyömi guiñēmæ bai waème pönī ingæimpa. Incæte yo mongænte ate cæncadē guiidinique ti nä

bacæimpa. Ìninqe cædente wæcæbiimpa,” angä eñentabopa.

¹⁰ Wængongui anquedo önönempo dadi ompointa guiyanta æninqe botö ade cæntabopa. Önöne guinëmæ bai waëme pönï i incæte yo mongænte ate cæncadë guidinque ti nä badinque cædente wætabopa. ¹¹ Ayæ botö imote angantapa. “Wacä awënë nãni cabo wacä awënë nãni cabo incæ wabæca nãni quëwencabo wabæca nãni quëwencabo incæ wadö nãni tedecabo wadö nãni tedecabo incæ wabæca wabæca nãni awënë odeye cabo iñönånite bitö, Mäninãni inånite æbänö baquii, ante wæætë Wængongui beyæ apænecæbiimpa,” ante angantapa.

11

Wængongui æbänö cæcää, ante mënaa apænedapa

¹ Wacä botö imote, Tee manguimpa impa, ante cæwipa bai pædæ pönöninge ayæ botö imote, “Goe, angantapa. Wængongui oncö tæiyæ waëmö oncönë godinque mänincö tönö, Wængongui qui, ante nãni iya täimpa tee mäe. Ayæ waodäni adoyömö ædæ wææninqe Wængongui ingante, Bitö Wængongui Awënë imidö anguënë, ante watapæ apænedäni iñömö æpodänidö inãni, ante tee mampote cæe. ² Wængongui oncö tæiyæ waëmö oncönë tee mäninqe yacö boyäa iñömö tee mänämaï ie. Edæ mänincö boyäa wadäni oodeoidi inämaï inãni inånite do godonte intapa. Mäninãni edæ coadenta i doo apäicä ganca mänimpoga iñonte Wængongui nänö tæiyæ waëmö quëwëñömö incæ wo ewente cæcædänimpa. ³ Ayæ botö imotedö ante,

Botö æbänö cæboo, ante nē, Nö ante impa, ante apæneda iñönte botö godö cæquimo beyænque tömëna tæi piñænte badinque müido dootiento tetenta eönæ mänimpoönæ iñonte botö beyæ apænecædaimpa. Waodäni wæwente beyænque gömæ ëmoncoo mongænäni bai tömëna adobai gömæ ëmoncoo mongæninque apænecædaimpa,” ante apænecä ëñentabopa.

⁴ Wængongui æbänö cæcää, ante nē, Nö ante impa, ante apæneda iñömö tömëna iñömö Wængongui inguipoga Awënë iñongante tömengä weca odibowæ näni äwæ mēwäa ongöwæ bai inapa. Ayæ tömengä weca yædo concædi ti wodönoincade mencadea ongoncade bai mänina iñömö adobai inöna inapa. ⁵ Wadäni, Tömëna inate wënæ wënæ cæinëmopa, ante cædäni ininque tömëna wæætē nē piinte cædäni inänite gonga wo tadete bai cædinque wænöna wæncædänimpa. Edæ, Tömëna inate wënæ wënæ cæinëmönipa, ante nē cædäni tömänäni mänömai wæncædänimpa. ⁶ Wængongui godö cæcä beyænque tömëna tæi piñæna badinque, Wængongui beyæ möna apæneyedē cöönæ cædämai ingæimpa, ante cædinque öönædē tee mönete bai cæcædaimpa. Ayæ tæi piñæna inöna inte tömëna æyedēmē cæinëna incæ wæætē wæætē cæyönate æpæncoo tömancoo wepænque bacæimpa. Adobai inguipoga tömämæ quëwänäni inänite tömëna cæda ate quiëmē wænömämocoo incæ pö wënæ wënæ bacædänimpa.

⁷ Ayæ tömëna, Wængongui æbänö cæcää, ante inque apæneda ate babæcä bai mönö guiñëngä inte tadömengadænguipo inö tadinque tömëna inate guëadö guëa cædinque tæi ëmongä

inte gänä cædinque wænongä wæncædaimpa. ⁸ Wæna ate tömëna baonque ñænængade nani quëwëñömö taadö iñömö öñoncædaimpa. Edæ Todömä iñömö quëwënäni wīwa cædäni bai ayæ Equitobæ quëwënäni wënæ wënæ cædäni bai mänii ñænængade nani quëwëñömö nē quëwënäni iñömö adobai wënæ wënæ cædänipa. Mänii quëwëñömö adoyömö tömëna Awënë ingante awäa timpote wænönäni wængacäimpa. ⁹ Mëönaa go adoönæque go tæcæ itædë iñonte tömëna baö ini acæte ante pöningue wacä awënë nani cabo wacä awënë nani cabo incæ waodäni nani cabo waodäni nani cabo incæ wadö nani tedecabo wadö nani tedecabo incæ wabæca wabæca nani quëwencabo incæ waodäni nangui inäni ponte tömëna baö acædänimpa. Ayæ, Da wënämaï ingäimpa, ante wææ cæcædänimpa. ¹⁰ Tömëna iñömö Wængongui beyæ nē apænedina inöna inte ingui-poga quëwënäni inänite nangui äna wædinäni inte tömënäni ñöwo wæætë watapæ tocædänimpa. Ñinque tömëna mänömaï wænte öñöna ate tömënäni nangui Yæ yæ todinque wacä ingä wacä ingä, Önonque æe, ante pædæ godönäni æncædänimpa.

¹¹ Mëönaa go adoönæque go tæcæ itædë iinque go ate Wængongui edæ, Quëwencæmina, ante tömengä nänö guëmämämo quëwenguimämo woo öongacä ate tömëna iñömö wæætë miina badinque ængæ ganticædaimpa. Ængæ gantiyöna nē adäni guiquënë ancai guñente wæcædänimpa. ¹² Ancai guñente ayönäni tömëna öönædë inö tedepämo yedæ ante ëñencædaimpa. “Iñömö pö æeda,” angä ëñëningue tömëna öönædë inö boguimancodë æiyöna tömëna inate nē piinte cædinäni edonque

acædänimpa. ¹³ Tömëna æiyedë mänïñedë goinque nanguï ocæ ocæ goquimpa. Tömënäni nāni quëwëñömö onconcoo bacoo iñonte pancaconga incæ nanguï onconcoo acapowate bogocæ tæ gowæænguimpa. Ado goinque goyedë waodāni tiæte miido ganca wæncædänimpa. Ayæ miināni quëwënāni ancai guiñëninque, Wængonguï öönædë nē quëwëmi imi inte bitö nö tæi piñænte imidö anguënë, ante wæcædänimpa.

¹⁴ Ayæ mempoga nāni wæquinque do iinque batimpa. Incæte godömenque adopoque nanguï pöni nāni wæquinque oo pöni bacæimpa.

Todompeta æmæwoya

¹⁵ Wængonguï anquedo tömangä iñömö tömengä todompeta we we öongä ate öönædë inö wadāni nāni tedepāmo yedæ tededinque iimaï änānitapa.

“Mönö Awënë Wængonguï tömengä Codito tönö inguipoga Tæiyæ Awënë Odeyeda badinque wantæpiyæ cöwë aacædaimpa,” änānitapa.

¹⁶ Nē aadāni nē Picænāni iñömö bæinticoatodo ganca ināni mänimpodāni iñömö Wængonguï weca tömënāni awënë tæ contaimpaa nē tæ contadāni inte ñöwo guidömëmæ ædæ wææninque Wængonguï ingante, Bitö Awënë Wængonguï imidö anguënë, ante watapæ apænedänitapa. ¹⁷ Ayæ iimaï apænedinque,

“Awënë Wængonguï bitö adobique Tömää nē Cædömi inte wëenëñedë do nē quëwengäimi imi ñöwobi inömi imipa.

Bitö nämä tæi piñæmi inte ñöwo ædæmö nē aabi inömi imipa,

ante adinque bitö ïmite waa ate pönente
apænemönipa.

18 Wabæca wabæca nāni quëwencabo incæ
tömānāni quëwēnāni ænguï badānitapa.

Ayæ bitö ænguï babi ïninqe

nē wængaināni ïnānite bitö apænte panguiönæ do
batimpa.

Ayæ bitö beyæ nē apænedönāni ïñömö bitö ïmite
nē cædönāni ïñönānite

tömēnāni ïnānite bitö, Minitö cædi beyæ paga
cæbo æncæminimpa, ante bitö godonguiönæ
dobæ batimpa.

Ayæ bitö quīnāni ïñönānite bitö ëmowo ante bitö
ïmite nē ëñente cædönāni ïñönānite

awēnē bai ïnāni incæ önönānique ïnāni incæ
tömānāni ïnānite bitö, Minitö cædi beyæ
paga cæbo æncæminimpa, ante bitö
godonguiönæ dobæ batimpa.

Ayæ inguipoga quëwēnāni ïnānite wadāni nē wo
ëwente cædönāni ïñönānite bitö wo ëwente
cæquiönæ do batimpa.”

19 Ayæ öönæde ïnö Wængonguï tæiyæ waëmö
oncö odemö wibænetapa. Wibæneyö Wængonguï,
Waadāni æbānö cæte botö tönö godongāmæ waa
cæte quëwencædanimpa, ante odömoncæte ante
nänö yewæmongainca nāni da wencaincade
ïñömö mänincönē mæ ongoncade atabopa.
Ayömote yædæ yædæ nāinimpa. Yedæ pönī ānimpa.
Detæbo tæi tæi tēñö yedæ pönī ānimpa. Goinque
gotimpa. Ayæ yoguica cöönæ bai nanguï cæte
wæænimpa.

12

Onquiyængä tönö dadagöö nani änonngä

¹ Wængonguï, Mä pönï odömömo adinque ëñencädänimpa, ante cædinque öönädë inö waëmö pönï badongä a owo atabopa. Edæ onquiyængä iñömö nænque inte weocoo wëñate bai mongæñongä apäicämo incæ tömengä cæncadëwa ænömengadæwa inö impa. Tömengä, Awënë poganta, ante tipæmpoga go mëa nëmöidi inte godämæ badöinta wencacantapa. ² Mäningä onquiyængä yädëmadä ënengä iñongante wëñængä ëñacæ cæcä wæte wædinque wëñæ nantate Yæ yæ wæcantapa.

³ İinque Yæ yæ wæyongante öönädë inö mä pönï Wængonguï nänö badöi wadö bai badöi a owo atabopa. Edæ ñænængade obe bai dadagöö nani änonngä opatawæ ëñacä inte tömengä ocabocoo önonmpo æmæmpoque go mencaa encacä inte mänii ocabocooga awënë pogantacoo önonmpo æmæmpoque go mentaa wencacä ingantapa. Tömengä önonmoncawæ adobai önonmpo tipæmpoga ocabocooga encacä ingantapa.

⁴ Tömengä önoncaimiñænca picæ cæmiñæninque öönädë owodäni nëmöidi incæ pancadäniya incæ nanguï inäni inänite wææntodongä inguipoga tæ wæænänitapa. Onquiyængä oo pönï iñongante dadagöö, Wëñængä ëñacä ate cæncæboimpa, ante tömengä weca a ongongantapa.

⁵ Onquiyængä wëñængä onguïñængä ingante mangä İinque tömengä iñömö nänö Awënë baquinque pæcantapa. Tömengä iñömö tæiyæ awënë tömengä nempo quëwënäni inänite aacä

baï adobaï tömämæ quëwënäni inänite, ïïmäi cæedäni, ante aacæcäimpa. Mäningä onquiyängä wëñängä ingante wacä ö ænte Wængongui weca ayæ tömengä nänö aacæ tæ contayömö mäniñömö ænte mæicä æicantapa. ⁶ Mäninö bayonte wäänä iñömö önömæca iñömö wodii gocantapa. Tömengä beyæ ante Wængongui nänö eyepæ cæyömö mäniñömö wodii gocantapa. Mäniñömö müido dootiento tetenta ëönæ mänimpoönæ iñonte tömengä quëwente beyæ cænguï eyepæ pönönäni cæncæcäimpa, ante Wængongui tömengä nänö owoyömö ante do badongantapa.

⁷ Mäniñedë edæ öönädë iñömö guëadö guëa cæte wænönänitapa. Wængongui anquedo Miiguedo näni angaingä iñömö tömengä wadäni anquedoidi awënë inongä ingampa. Tömengä tömënäni tönö dadagöö ingante wido cæcæte ante cæyönäni dadagöö wæætë tömengä anquedoidi tönö wæatedö wæætë guëa cædäni incæte ⁸ tömënäni ædö cæte gänä cæquinänii. Edæ ædö cæte öönädë iñömö ayæ quëwenguinänii, ante tömënäni inänite wido cædänitapa. ⁹ Tömënäni iñömö ñænængade dadagöö ingante wido cæte wææntodönänitapa. Mäningä dadagöö iñömö wëenëñedë tæntæ ingaingä inte tömengä ëmowo Wënæ Tatäna mëwoga ëmongä ingampa. Adocä, Inguipoga quëwënäni tömänäni oda cæcædänimpa, ante në wapiticæ ænte mäocä ingampa. Tömengä ingante ayæ tömengä anquedoidi inänite inguipoga iñömö wido cæte wææntodönänitapa.

¹⁰ Ayæ ate öönädë inö tedepämo yedæ ante iïmäi ä ëñentabopa.

“Ñöwoönæ mönö Wængongui mönö imonte,
Minitö botö æmæwo æmo beyænque
quëwenguimïni, ante tömengä nänö cæönæ
batimpa.

Ayæ tömengä nänö tæi piñænö ñöwoönæ ba inique
tömengä adobai Tæiyæ Awënë Odeye ñöwoönæ
bacäimpa.

Ayæ tömengä nänö apænte ængaingä mönö Codito
adobai nämä tæi piñængongä inte nê angä
bacäimpa.

Wænæ guiquënë mönö tönïñadäni inänitedö ante,
Wænæ wænæ cædänidö angüënë, ante
wapiticæ apænete änewëngongä ingampa.

Woyowotæ incæ itædê incæ mönö Wængongui
weca a ongöningue
tömengä mäninäni inänitedö ante nê wapiticæ
änewëngongä iñongante tömengä ingante
inguiyoga iñömö wææntodönäni
wæængantapa.

11 Wængongui Codotedo wepæ tömengä nänö
wænte godongaïmæ beyænque tæi ëmönäni
badinque

mönö tönïñadäni iñömö wænæ ingante gänä
cædänitapa.

Ayæ, Wængongui æbänö cæcää, ante tömënäni nani
apænedö beyænque tömënäni tæi ëmönäni
badinque wænæ ingante gänä cædänitapa.

Wadäni tömënäni inänite Wængongui beyæ
wænoncæ cæyönäni tömënäni,

Mönitö guiñänämaï wæncæmönimpa, ante nê änäni
inänitapa.

12 Mänömaï beyæ minitö öönædê iñömö nê
quëwëmïni inte watapæ tocæminimpa.

Wamini guiquenë inguipoga iñömö æpæntibæde
iñömö nē quēwemini inte mini wæquinque
ingæimpa.

Edæ wænæ minitö weca wææ pö quēwengäimpa.

Tömengä nänö wo ewenguinö oo pöni impa, ante
ēñente beyænque äingä pöni bacampa.

Mänömaï beyæ minitö guiñenguimämo baquinque
impa.”

Mänömaï ante yedæ angä ēñentabopa.

¹³ Ayæ dadagöö, Botö imote inguipoga
iñömö wido cæte wææntodönäni adi wædö,
ante wædinque onquiyängä ingante wēñängä
onguiñängä nē mäningä ingante bæi ongoncæte
ante togængantapa. ¹⁴ Incæte Wængongui,

Önömæca iñömö bitö beyæ botö cæyömö pao
pao gocæbiimpa, ante cædinque ñænængade
guingämowæ önguēnepæ bai tipænguēnepäa
pönö badongä enguēnepænte bai onquiyängä
bacantapa. Inique onquiyängä, Tæntæ botö
imote bæi ongönämaï incæcäimpa, ante Wængongui
önömæca tömengä beyæ nänö cæyömö pao pao
gocantapa. Mëa go adoque tæcæ wadepo iñonte
tömengä mäniñömö quēwente beyæ nänö cængui
eyepæ ænte cænguiñömö gocantapa. ¹⁵ Ayæ,

Onquiyängä ingante æpæ quingæ mangui bai
bæ ta tæi guicæcäimpa, ante cædinque dadagöö
tömengä önöne inö önö bai æpæ towæ tadonte
bai tao godecantapa. ¹⁶ Dadagöö towæ tadonte
bai nänö tao godepæ quingæ pönö onguipo
incæ onquiyängä beyæ ante cædinque wi ænete
cæyö ada guiipæntapa. ¹⁷ Ada guiipæ adinque
dadagöö iñömö onquiyängä ingante godömenque

ænguï badinque wadæ godinque, Mäningä onquiyængä wënäni incæ wadäni inänite guëa cæte wænonguïmo, ante gocantapa. Tömënäni Wængonguï nänö, İïmai cæedäni, ante wææ angainö ante nē ēñente quëwënäni inte, Itota æbänö cæcää, ante nē apænete quëwënäni inönäni iñömö mäninäni mäningä onquiyængä wënäni iñönänite dadagöö, Wænoncæboimpa, ante gocantapa.

13

Mënaa mönö guiñënöna

¹ Ayæ dadagöö æpæntibæ yæwedeca emönaiya iñömö ponte a ongongantapa.

Ayæ babæcä bai nē guiñëngä iñömö æpæntibædë quëwente ta pöñongä atabopa. Mönö guiñëngä tömengä ocabocoo onompo æmæmpoque go mencaa encacä inte tömengä önömoncawæ onompo tipæmpoga ocabocooga inö encacä ingantapa. Awënë pogantacoo tipæmpoga ganca tömengä önömoncawäa da da wencate encacantapa. Ayæ Wængonguï emöwo incæ wiwa babæ wapiticæ ante äniwoi tömengä ocabocooga tömancooga inö yewæmonte encacä ingantapa. ² Mäningä mönö guiñëngä botö nē adingä iñömö mëñe bai emönongä incæte tömengä önöwa oto önöwa bai ewacä inte tömengä önöne nöö önöne bai enecä atabopa. Ayæ dadagöö nämä nänö tæi piñænö ante mönö guiñëngä ingante pædæ godöninge tömengä nänö aacæ tæ containpa pædæ godongä ænte tæ contadinque mönö guiñönongä nē awënë badinque, İïmai

cæedäni, ante nanguï angä bacantapa. ³ Ayæ mönö guïñënogä adoque ocaboga ämocate wæncæ cæcä bai ingaingä incæte gämæ cæcate ingantapa.

Tömämæ quëwënäni mönö guïñënogä ingante adinque ancai guïñëninque tömänäni tömengä miñæ godänitapa. ⁴ Dadagöö godö cæcä beyænque mönö guïñënogä iñömö awënë badinque dadagöö bai në angä do bacä impa, ante adinque tömänäni dadagöö ingante, Bitö Awënë Wængonguï bai imidö anguënë, ante apænedänitapa. Adobai mönö guïñënogä ingante, Bitö Awënë Wængonguï bai imidö anguënë, ante apænedänitapa töö. Mäninö ante godömenque iïmai äninque, “Æcänö mönö guïñënogä bai ingä iñömö edæ dæ angampa. Æcänö tömengä ingante guëadö guëa cædinque tæi ëmonte gänä cæquiringä.”

⁵ Dadagöö godö cæcä beyænque mönö guïñënogä iñömö nämanque pömente änewënogä badinque Wængonguï ingantedö ante babæ wapiticæ ante änewëninque, Botö Wængonguï bai imopa cæminii, änewënogantapa. Ayæ awënë badinque në angä badingä inte mönö guïñënogä iñömö coadenta i doo apäicäa mänimoga iñonte, iïmai cæedäni, ante aacantapa. ⁶ Ayæ tömengä mäniñedë Wængonguï ingantedö ante wënæ wënæ babæ wapiticæ ante änewënogä inte Wængonguï ëmowo ante tömengä nänö quëwëñömö ante babæ wapiticæ ante änewënogantapa. Tömänäni öönädë në quëwënäni inänitedö ante adobai babæ wapiticæ ante änewënogantapa. ⁷ Tömengä Wængonguï quinäni inänite guëadö guëa cæcæcäimpa, ante cædinque dadagöö godö

cäcä beyænque tömengä nämä tæi piñængä badinque tömënäni inänite tæi emongä inte gänä cæcantapa. Ayæ dadagöö godö cæcä beyænque mönö guiñëongä iñömö waodäni nani cabo waodäni nani cabo incæ wacä awënë nani cabo wacä awënë nani cabo incæ wadö nani tedecabo wadö nani tedecabo incæ wabæca nani quëwencabo wabæca nani quëwencabo iñönänite tömengä tömänäni awënë badinque tömënäni inänite, İimai cæedäni, ante nē angä bacantapa.

⁸ Mänömaï beyæ tömämæ quëwënäni iñömö tömengä ingante, Bitö Awënë Wængongui bai imidö anguënë, ante apænecædänimpa. Wængongui inguipoga nänö badöñedë, Botö Codotedo ingante do wænönäni wæncæcäimpa, ante do angacäimpa. İingä Codotedo, Nani quëwenguinta, ante nänö yewæmongaintaa ædänidö emowo yewæmönämaï inäni iñömö tömënänique mönö guiñëongä ingante, Bitö Awënë Wængongui bai imidö anguënë, ante apænecædänimpa.

⁹ Nē äamonca imini inte eñëedäni.

¹⁰ “Æcämenque ingante ante apænedinque Wængongui, Ao bæi ongonte tee mönete bai cæedäni, angä ininque tömengä ingante do bæi ongonte tee mönecædänimpa.

Æcämenque ingante ante apænedinque Wængongui, Ao yaëmenca wænömöni wæncæcäimpa, angä ininque tömengä ingante do yaëmenca wænönäni wæncæcäimpa.”

Mänömaï beyæ minitö Wængongui quimöni iñömö wæntæye inämaï inte ee cæcæminimpa.

Edæ tömengä ingante godömenque wede pönencæminimpa.

¹¹ Ayæ ate wacä babæcä bai në guiñenongä guiquênê onguipodê quëwente ta pöñongä atabopa. Codotedoidi önömoncawæ mēwāa nāni ēmoncadö bai tömengä adobai encacä ingantapa. Incæte tömengä dadagöö bai tedecantapa.

¹² Mönö guiñenongä tänocä pöningä nänö änö beyænque ayængä pöningä iñömö awënë badinque tänocä beyænque äninque, İimaï cæedäni, ante në aacä ingantapa. Tānocä pöningä mönö guiñenongä ämocate beyæ në wæncæ cæcä incæ wæætê gämæ cæcadingä iñongante ayængä pöningä iñömö tömämæ quëwēnāni inānite angä ēñēninque tömānāni tänocä pöningä ingante, Bitö Awënë Wængongui bai imidö angüenê, ante apænedānitapa. ¹³ Māningä mönö guiñenongä ayængä pöningä, Mā pönī cæbo adinque ēñencædānimpa, ante cædinque badongampa. Ayæ godömenque mā pönī cæcä beyænque waodāni edonque pönī ayönāni öönæde inö incæ gonga inguipoga wææ adānitapa.

¹⁴ Mönö guiñenongä tänocä pöningä nänö änö beyænque tömengä weca mā cædinque ayængä pöningä iñömö tömämæ quëwēnāni inānite oda cæte nāni goquino ante mäocä godānitapa. Edæ tömēnāni inānite äninque, Mönö guiñenongä yaēmenca guiiyömö wæætê gämæ cæcate në mīingä quëwengä nänö emönö bai adobai badöedāni, angä ēñente badonte concædānitapa. ¹⁵ Mönö guiñenongä ayængä pöningä iñömö eyepæ cædinque mönö guiñenongä tänocä pöningä nänö

ëmönö bai nani badöinca incæ, Tedecæcäimpa, ante cæcä ate mäninca incæ oo guëmangantapa. Tömënäni nani badöinca ante waodäni Baa äninque, Bitö Awënë Wængongui bai imidö anguënë, ante apænedämaï inäni inänite mäninca incæ ä beyænque wænönäni wænänitapa.

¹⁶ Ayæ awënëidi bai inäni incæ önönänique incæ mäincoo eadäni incæ mäincoo ömæpodäni incæ wacä godonte æningä beyænque në cæte quëwënëni incæ nämanque cæte quëwënëni incæ mäninäni tömänäni inänite tömengä nänö änö beyænque önompo tömempo inö yewæmöinäni badänitapa. Wæætë önompo tömempo inö yewæmönämaï inäni inte tömënäni önönemö inö yewæmöinäni badänitapa. ¹⁷ Tömengä nänö yewæmöi yewæmönämaï inäni guiquënë tömënäni mäincoo ædö cæte godonte ænguïnänii. Ædö cæte godonte ænäni weca gote tömënäni mäincoo inï godonte ænguïnänii. Ayæ mäninö ante yewæmöi inönmö mönö guinönongä tänocä pöningä ëmowo impa. Wii tömengä ëmowo yewæmonte i bai tömengä ëmowo ante beyæ, Æpodö i, ante yewæmonte impa.

¹⁸ Mäninö ante ëñencæte ante nani ëñenö ante eyepæ encadäni inte ëñencædänimpa. Ocai në encacä ininque, Mönö guinönongä tänocä pöningä nänö, Æpodö i, ante ëñencæte ante cæcæcäimpa. Edæ tömengä, Æpodö i, ante waocä, Æpodö i, ante adopo impa. Tömengä nänö, Æpodö i, ante teitiento teitenta i tei impa.

14

144.000 ganca inäni nani ämotamini äinö

1 Ayæ botö ayömete Wængongui Codotedo änanquidi iñömö Tiöno nani anquidi mäniñömö a ongongä atabopa. Tömengä weca waodäni tiento coadenta i coatodo müido ganca inäni inte Wængongui Codotedo emöwo adobaï tömengä Mæmpo Wængongui emöwo nani önönemö inö nē yewæmöinäni inte a ongönäni atabopa. 2 Ayæ botö eññömöte öönæde inö tedepämo ante ñænæ tēñabo ante baï detæbo eyequei tē baï eññenque adobaï waodäni nani adapate nani ampoque inte tæiyænäni ampyönäni ante baï tedepämo tē eññentabopa. 3 Tiento coadenta i coatodo müido ganca inäni iñömö mä äninque waa ämotamini ante äñanitapa. Wængongui nänö aacæ tæ containpa gäänē ämotamini äñönäni miñäni quëwënäni mäa go mäa ganca inäni nē aadäni nē Picænäni tönö eññänitapa. Tiento coadenta i coatodo müido ganca inäni inguipoga quëwënäni tönö adoyömö quëwëñönäni, Godonte æmo beyænque quëwenguimini, ante Wængongui nänö nē æninänique i ämotamini äinö ante eññente ancædänimpa. Wadäni guiquënë ædö cæte eññente anguinäni.

4 Iñäni iñömö Wængongui ingante ante waemö quëwencæmönimpa, ante cædinque, Onquiyængä, ante nē towënämaï ingainäni inänipa. Iñinque tömënäni Wængongui Codotedo ædönö gocä tömengä miñæ cöwë godänipa. Tömënäni waodäni tönö adoyömö quëwëñönäni Itota, Botö wepæ beyænque quëwenguimini, ante tömënäni inänite ængacäimpa. Täno amiña bayedē tä pedinque minitö, Wængongui qui baquimpa, ante muni

cönöni bai mäninäni adobai Wængongui quinäni badinque Wængongui Codotedo quinäni inänipa. ⁵ Adodäni cöwë babæ änämaï inäni ininque wadäni ædö cæte tömënäni inänitedö ante, Babæ änänipa, ante anguïnänii. Tömënäni edæ cöwë wënæ wënæ cædämaï inänipa töö.

Wængongui anquedoidi mēnaa go adocanque nāni änö

⁶ Ayæ Wængongui anquedo wacä iñömö öönæde inö pö pao pao gocä atabopa. Inguipoga nē quëwënäni inänite wabæca nāni quëwencabo wabæca nāni quëwencabo incæ waodäni nāni cabo waodäni nāni cabo incæ wadö nāni tedecabo wadö nāni tedecabo incæ wacä awënë nāni cabo wacä awënë nāni cabo iñönänite anquedo tömänäni inänite Wængongui wantæpiyæ cöwë nänö watapæ apænedö ante eñencædänimpa, ante apæ necæte ante pongantapa. ⁷ Mäningä Wængongui anquedo iñömö yedæ iïmaï äninque, “Wængongui apænte nänö anguïönæ do inque bayonte mäniönæ tömämini mini cægainö ante tömengä apænte ancæcäimpa. Ininque tömengä ingante guiñëninque ee aedäni. Adobai tömengä ingante waa aedäni. Tömengä edæ öönæde incæ inguipoga incæ æpæntibæ incæ æpæ tayömö incæ tömäa nē badongaingä ingante minitö, Bitö Awënë Wængongui imidö anguënë, ante ædæ wææninqe watapæ apæneedäni. Mäninque ämopa,” angantapa.

⁸ Mäningä Wængongui anquedo gocä ate wacä Wængongui anquedo ayængä pöninque iïmaï angantapa. “Babidönia nāni äñömö do wo ewente batimpa. Babidönia nāni waëmö quëwëñömö

i incæte do wo ewente ba aedäni. Mäniñömö nē quēwēnāni wēnæ wēnæ cædināni iñömö on-quiyængä nē towengä bai cædinque biinömæ bete quidi quidi dowæninque towencædänimpa, ante ti nāmæ godonte bai cædänipa. Tömēnāni mänömaï godö cædāni beyænque wabæca nāni quēwencabo wabæca nāni quēwencabo wæætē wēnæ wēnæ cædänitapa. Mäninque ämopa,” angantapa.

⁹⁻¹⁰ Ayæ mäningä Wængongui anquedo gocä ate wacä Wængongui anquedo tömängä pöningque yedæ iïmaï angantapa. “Mönö guiñēnongä tänocä pöningä ingante æcänö, Bitö Awēnē Wængongui bai imidö anguēnē, ante apæ necää. Ayæ tömengä nänö emönö bai nāni badö ninca gäänē ædæ wææninque æcänö apæ necää. Wængongui tömēnāni inänite nanguï piincæcäimpa. Tömēnāni önompo incæ önonemö incæ mönö guiñēnongä nänö yewæmöi nē yewæmöināni adinque Wængongui adobai tömēnāni inänite nanguï piincæcäimpa.” Äninque Wængongui anquedo godömenque apæ necantapa. “Mänināni Wængongui biinömæ nänö piimæ becædänimpa. Mänimænque æninque tömengä nänö piinte owætadē pe ñiñængantapa. Mänimænque nē bete bai ināni iñömö nanguï pöni wæwencædänimpa. Wængongui tæiyæ waemö anquedoidi weca ayæ Wængongui Codotedo weca gonga bæcoyömö atopode nāni öö wadö gonga bæcoyömö öö wayömö mäniñömö iināni æmæwo gonte ba bai nanguï wæwencædänimpa,” angantapa.

¹¹ “Ayæ tömēnāni gonga bæcoyömö mäniñömö wæwēñönāni nāni wæwēmāmo tēemä bai cōwē æicömpa. Woyowotæ incæ itädē incæ mänināni

edæ guëmänämaï incædänimpa. Tömënäni iñömö, Mönö guiñëongä tänocä pöningä weca ædæ wææninqe, Bitö Awënë Wængongui bai imidö anguënë, ante nē apænedäni inänipa. Ayæ tömengä nänö emönö nani badöninca gäänē ædæ wææninqe nē apænedäni adobai tömengä emöwo nänö yewæmöi nē yewæmöinäni inte mäninäni tömänäni wantæpiyæ mänömaï guëmänämaï inte wæwencædänimpa. Mäninqe ämopa,” angantapa.

¹² Mänömaï beyæ minitö Wængongui quimäni iñömö tömengä nänö, iïmaï cædäni, ante nänö wææ angainö ante eñente cædömini inte ayæ Itota ingante godömenque wede pönemäni inte minitö wæntæye inämaï inte ee cæcæminimpa.

¹³ Ayæ ate botö öönæde inö tedepämo iïmaï ante eñentabopa. “Bitö iïmaï yewæmöe,” angantapa. “Ñöwo ganca ayæ ate Awënë Itota ingante pönente nē wænänäni inte tömënäni nani toquinque.”

Ante añongä Wængongui Tæiyæ Waëmö Önöwoca, “Ao ämopa, angampa. Nani toquinque ingäimpa. Tömënäni nani nanguï cægainö ñimpo cæte guëmancædänimpa. Edæ tömënäni nani waa cægainö öönæde iñömö edonque pöni acæimpa,” ante angantapa.

Inguipoga quëwënëni beyæ amñña bai baccäimpa

¹⁴ Ayæ botö ayömo näämænta boguimä mä owo atabopa. Adocanque Waocä eñagaingä ingä bai iñömö mänii boguimäa tæ contacä atabopa. Tömengä ocaboga awënë poganta oodo inte badöinta encacä inte tömengä nänö önönempo yaëmë bai waingamë idämæ engamë næængä atabopa. ¹⁵ Ayæ ate wacä anquedo

Wængongui oncö tæiyæ waëmö oncönë ta pöningue boguimäa nê tæ contacä ingante iïmaï yedæ ante aa pecantapa. “Inguipoga quëwënäni botö imote nê wede pönente waa cædönäni iïñömö nê minte pæmö bai inäni inte tömënäni nani to amiña bayedë bai impa. Wadæ wadæ pïnöningue nani ö æñedë bai do bayonte bitö yaëmë bai bitö nææï ænte gote mäninäni inänite wadæ wadæ pinonte bai cædinque ö æe.” ¹⁶ Angä ëñëningue boguimäa nê tæ contacä gote inguipoga iïñömö tömengä yaëmë bai nänö nææï inte wadæ wadæ pinonte bai cædinque tömänäni nê minte pæmö bai inäni inänite ö ængantapa.

¹⁷ Ayæ öönædë iïñömö Wængongui oncö tæiyæ waëmö oncönë ongonte ta pöningue wacä anquedo adobai yaëmë bai waingamë idämæ engamë nææente pongantapa. ¹⁸ Tömengä pongä ate Wængongui anquedo wacä pongantapa. Wængongui oncö tæiyæ waëmö oncönë, Wængongui qui, ante iya tæe, ante nê änongä inte nani iya täimoga gäänë ongöningue ta pöningue yaëmë bai waingamë idämæ nê engamë næængä ingante iïmaï yedæ apæncantapa. “Inguipoga tömäo nê wënæ wënæ cædäni iïñömö yowecoo bai inänipa. Mäninäni yowe ite bayedë bai inäni adinque bitö yaëmë bai bitö nææï ænte gote yowecoo wangö tadampote gæte bai cædinque tömënäni inänite cæe.”

¹⁹ Angä ëñëningue Wængongui anquedo inguipoga iïñömö tömengä yaëmë bai nänö nææï inte wangö tadampote cædinque yowecoo gædäni bai tömengä nê wënæ wënæ cædäni inänite adobai cæcantapa. Ayæ yowepæ ante ñænængade

näni pīnā pīnā gāwate cæincadedē yowecoo wææntodonte bai cædinque tōmengā wēnæ wēnæ cædāni inānite Wængonguī pīinte nänö pāiñōmō wido cæcantapa. ²⁰ Māniī tōmēnāni yowecoo ænte pīnā pīnā gāwate cæincade iñōmō tōmēnāni nāni quēwēñōmō yabæca ongompa. Māniñōmō tōmēnāni inānite pīnā pīnā gāwate bai cædānitapa. Cæyōnāni tōmēnāni wepæ nanguī pōni gotimpa. Cabayo goto wīnediñōmō æi ganca tōmēnāni wepæ māninganca æi godinque todee tiento quidōmetodo ganca māninganca nanguī pōni wepæ gotimpa.

15

Ticete ganca nāni wæwenguimāmo pompa

¹ Ayæ botō ayōmote Wængonguī ñōwo wæætē mā pōni odōmōmo adinque ēñencædānimpa, ante cædinque öönædē inō bamōnengæ pōni badongā a owo atabopa. Wængonguī anquedoidi öonompo æmæmpoque go mēnaa ināni iñōmō öönædē ongōñōnānite tōmēnāni inānite, Mīnitō cæmīni beyænque waodāni nāni wæwenguimāmocoo öonompo æmæmpoque go mempoga pongæimpa, angā ēñente ænte pōnānitapa. Māniī wæwēmāmocoo æmæwo ba adinque Wængonguī nänö ænguī panguimāmo eyepæ bapa.

² Ayæ æpæntibæ iñōmō awocawænta emō bai adinque botō mānintibæ tōnō gonga guēa wempodente bæco atabopa. Adotibæ yæwedeca waodāni mæ ongōnānipa. Mānināni iñōmō mōnō guiñēnongā ayæ pōningā ingante ante ayæ tōmengā nänö emōnō bai nāni badōninca

ante Baa äninque tömënäni tæi emonte gänä cädäni inänitapa. Adodäni tömengä emöwo ante, Æpodö i, ante Baa ante yewæmönämaï inäni atabopa. Wængongui tömënäni inänite adapate nani ampoqui godongä ænte næænte a ongönänipa.

³ Tömënäni a ongöningue Wængongui ingante në cægaingä Möitee wodi ämotamini nänö angainö ante ayæ Wængongui Codotedo ämotamini nänö againö ante iïmaï ämotamini änänipa.

“Awënë Wængongui bitö adobique Tömää Cægaïmi inte

bitö mä cädö iñömö waëmö pöni inönö anguënë.

Bitö tömämæ quëwënäni Tæiyæ Awënë Odeyebi imidö anguënë.

Quiëmë cædinque bitö në nö cæbi imipa.

⁴ Awënë eñëmi, Æcämë bitö imite guiñënämaï inguingää.

Ayæ bitö emöwo ante pönente æcämë waa adämaï inguingää.

Edæ bitö adobique tæiyæ waëmö imipa.

Tömää bitö nö cædinö edonque pöni ba adinque wabæca wabæca nani quëwencabo tömänäni bitö weca ponte ædæ wæænningue

bitö imi, Bitö Awënë Wængongui imidö anguënë, ante ancädänimpa.”

⁵ Ayæ ate botö ayömote öönæde iñömö Wængongui tæiyæ waëmö oncö incæ æmontaicö bai inte tömengä nänö nänënë owocö iñömö wi ænete bayö atabopa. ⁶ Wængongui anquedoidi önompo æmæmpoque go mënaa inäni mänincönë ongonte ta pönänitapa. Tömënäni cädäni ate waodäni nani wæwenguimämo iñömö önompo æmæmpoque go mempoga pongæimpa. Tömënäni

weocoo waëmoncoo nïno nïni ancoo ñäö bai
ëmoncoo mongænïni inïnipa. Tömënïni tæcætawë
inö pacadeyænta oodo inte nïni badöinta
mongæënëmæïnïni inïnipa.

⁷ Ayæ müinïni quëwënïni mënaa go mënaa
iñönïni adocanque Wængonguï anquedoidi
önompo æmæmpoque go mënaa inïni iñönïnite
owætacoo adotaque adotaque pædæ godongä
ænïnitapa. Mänintacoo önompo æmæmpoque go
mentacoo iñömö oodo inte nïni badöintacoo inte
Wængonguï në wantæpiyæ cöwë quëwengaingä
ingä nänö ænguï pämämo eyede ënentapa.
⁸ Wængonguï nänö ñäö apäidö beyæ ayæ tömengä
nänö tæi piñæmämo beyæ tömengä tæiyæ
waëmö oncönë iñömö tëmämämo eyede mä
ongompa. Ayæ Wængonguï anquedoidi önompo
æmæmpoque go mënaa inïni cædäni ate waodäni
nïni wæwenguimämo ante önompo æmæmpoque go
mempoga nïni wæwenguinganca iinque baganca
æcämenque incæ Wængonguï tæiyæ waëmö oncönë
guidämaï incædänimpa.

16

Wængonguï nänö ænguï panguintacoo

¹ Ayæ ate Wængonguï tæiyæ waëmö oncönë inö
tedepämo yedæ tē ëñentabopa. Në angä iñömö
Wængonguï anquedoidi önompo æmæmpoque go
mënaa inïni inïnite, “Goedäni, äninque, Wængonguï
owætacoo nänö ænguï panguintacoo önompo
æmæmpoque go mëa ganca incoo næænte gote
ingui-poga iñömö gao cæedäni,” angä ëñentabopa.

² Wængonguï anquedo tänocä godinque tömengä
owætadë ënë incæ ingui-poga gao cæcantapa. Gao

cäcä ate mönö guiñëongä ayæ pöningä nänö yewæmöi në yewæmöinäni inte tömengä nänö ëmöno bai näni badöinca gäänë ædæ wææninque apænedäni iñönänite tömënäni ayaa nantai ñömæi tömäo baadinque nantate wæðänitapa.

³ Wængongui anquedo ayæ në gocä tömengä owætadë ënë incæ æpæntibæ cæncadëmæ gao cæcä ate mänimæ iñömö do wæninäni wepæ bai bayonte mänintibædë quëwënäni tömänäni wænänitapa töö.

⁴ Wængongui anquedo ayæ në gocä tömengä owætadë ënë incæ æpænë tömänonga gao cædinque æpæ tayömö tömäñömö gao cæcä ate mänimæ tömämæ wepæ batimpa. ⁵ Ayæ ate Wængongui anquedo æpæ tömämæ beyæ në angä inte iimaï apæncä ëñentabopa.

“Mönö Tæiyæ Waëmö inömi ëñëmi, bitö wëenëñedë do në quëwengäimi imi ñöwobi adobi inömi imipa.

Mänömaï tömënäni inänite apænte ante päninque bitö nö cædinque apænte pänimi imipa.

⁶ Edæ bitö quinäni tönö bitö beyæ në apænegainäni inänite wænönäni ate tömënäni në wænäni wepæ näate bagadänimpa. Bitö wæætë në wænonte näate badäni näni cægai beyæ wepæ godömi begadänimpa,” angantapa.

⁷ Ayæ Wængongui qui, ante näni iya täimoga inö tedepämo të ëñentabopa. “Ao ämopa. Awënë Wængongui bitö adobique Tömää Cægäimi inte, iimaï pancæboimpa, ante bitö apænte angainö bai cædinque tömënäni inänite päninque bitö cöwë nö cæte waa pämpa.”

8 Wængonguï anquedo ayæ nē gocä tömengä owætadē enē incæ nænque mæ owoyömö mänñömö gao cæcantapa. Ayæ waodäni æmontaiya montæ gongate wæcædänimpa, ante cædinque nē godö angä beyænque nænque nanguï tī nāwä batimpa. 9 Mänii nanguï tī nāwante beyæ waodäni montæ gongate badäni incæte tömënäni nāni wënæ wënæ cædinö ante, Ancaa wæwente awædö, ante ayæ pönënämaï inäni inte ñimpo cædämaï inte Wængonguï ingante waa adämaï inänitapa. Tömënäni, Wængonguï cæcä beyænque mönö wæwëmämocoo pönimpa, ante wædinque Wængonguï ingante piinique tömengä emöwo ante wënæ wënæ babæ ante tedewënänitapa.

10 Wængonguï anquedo ayæ nē gocä tömengä owætadē enē incæ mönö guiñenongä tänocä pöningä nänö aacæ tæ containpaa gao cæcä ate tömengä awënë odeye inongä inte nänö aayömö mæ mämonte bai batimpa. Waodäni nantate wædinque önonguënëwa æo pocænguënëwate wædänitapa. 11 Mänömaï wædäni incæte tömënäni nāni wënæ wënæ cædinö ante, Ancaa wæwente awædö, ante godömenque pönënämaï inäni inte ñimpo cædämaï inänitapa. Wæætë nantai baate nantate wædinque Wængonguï öönædē quëwërongä ingante piinte badinque wënæ wënæ babæ ante tedewënänitapa.

12 Wængonguï anquedo ayæ nē gocä tömengä owætadē enē incæ ñænæ önonga Eopadatedö nāni änonga mäninonga gao cæcä ate awënë odeyidi nænque tamönö quëwente nāni ponguïnö taadö ante önö tömäo amimö batimpa.

13 Ayæ wënæidi wentamö nāni ewocacabo mënaa

go adocanque inäni iñömö weque bai inäni ta pönäni atabopa. Dadagöö önönē inö adocanque wēnæ ta pongantapa. Mönö guiñēnongä tänocä pöningä önönē inö wacä wēnæ ta pongantapa. Ayæ Wængongui beyæ nē apænedömo imopa, ante nē babæ apænedongä önönē inö wacä wēnæ pongantapa. ¹⁴ Mäninäni wēnæidi önöwocaidi inäni inte mä cädäni inänipa. Iinäni iñömö tömämæ awēnē odeyeidi weca añecæ godinque tömēnāni inänite apænedinque, Awēnē Wængongui adocanque Tömää nē Cægaingä inte nänö apænte anguiönæ iñonte mīnitö godongämæ ponte guëadö guëa cæcæminimpa, ante cädänipa.

¹⁵ “Mönö Awēnē nämä incæ iimaï angantapa. Aedäni. Nē awēmö ængä iñontobæ pongä bai botö adobai änāmaï inte poncæboimpa. Æyedēnö ponguingä, ante nē mönāmaï ongongä iñömö tömengä wänö cönongä bai inongä inte nänö toquinque. Edæ tömengä, Ömaabo ināmaï incæboimpa, ante ayæ, Guiñēñate wädämaï incæboimpa, ante tömengä wecoo tömē weca ee mangä inongä ingampa,” angantapa.

¹⁶ Mänii wēnæidi önöwocaidi tömämæ awēnē odeyeidi inänite añecæ gote änäni eñēninque awēnē odeyeidi iñömö tömēnāni tontadoidi tönö Adāmaguedoö ebedeo tededö nāni añömö adoyömö godongämæ pönänitapa.

¹⁷ Ayæ Wængongui anquedo tömangä nē gocä tömengä owætadē enē incæ woboyæ owoyömö mäniiñömö gao cæcä ate öönädē inö Wængongui tæiyæ waēmö oncönē tömengä nänö aacæ tæ con-tayömö mäniiñömö tedepämo yedæ tededinque,

“Ñöwo iinque batimpa,” angantapa.

¹⁸ Ayæ ate yædæ yædæ näinimpa. Detæbo tæi tæi tē goyö yedæ pönī äanima. Ayæ goinque nanguī pönī ocæ ocæ gotimpa. Waodäni ingui-poga näni quëwenganca tömanganca mänii goinque bai wa goinque cōwë godāmaī inimpa. ¹⁹ Goinque ocæ ocæ goyonte tōmēnāni näni ñænæ quëwēñōmō incæ tænguimæ tænguimæ godinque mēñōmōnga go adoyōmonque batimpa. Ayæ wabæca näni quëwencabo wabæca näni quëwencabo incæ tōmāo näni quëwēñōmō onconcoo acapowate bogocæ tæ gowæænimpa. Wængonguī adobaī, Babidōnia näni waēmō quëwēñōmō quëwēnāni wēnæ wēnæ cædānīpa, ante pōnente wædinque ænguī badinque, Mīni wæwenguinque impa, ante owæta biinōmæ nänö pīimæ eyede ēnē godonte bai cædinque tōmēnāni inānite nanguī pīinque pangantapa. ²⁰ Tōmāā wāā tēiwænē iñōmō yogæ guitimpa. Ayæ onquiyabocoo adobaī dæ bibitapæ batimpa. ²¹ Ayæ öönædē inö yoguica cōönæ bai waodāniya tæi tæi wæænimpa. Māinca tæi tæi wæænīnca adocaque incæ wodo tiēē diboda tee mā ganca enca impa. Yoguica wēnæ wēnæ incapa, ante adinque waodāni, Māinca mōnō wēnæ wēnæ wæwēmāmo impa, äninque Wængonguī ingante pīinte badinque wēnæ wēnæ babæ ante tedewēnānitapa.

17

Onquiyængä mäincoo beyæ nē towente quëwēnongä

1 Wængonguï anquedoidi önompo æmæmpoque go mä ganca inäni önompo æmæmpoque go mä ganca owætacoo nē næænāni iñönānite adocanque botö weca ponte, “Pöe, angantapa. Onquiyængä mäincoo beyæ nē towente quëwëngä iñömö æpæncoo yædopäa nē tæ contacä apænte nänö panguinö ante botö odömömo acæbiimpa.

2 Inguipoga awënë odeyeidi incæ tömengä tönö towengadänimpa. Waodäni inguipoga quëwënäni incæ adobaï tömengä towëinënö beyæ tömengä biinömæ bete bai quidi quidi dowænte bai pönenämaï cægadänimpa,” ante apænecä ëñentabopa.

3 Wængonguï Önöwoca incæ botonga pö guiiyongä botö wiimonte bai iïmaï atabopa. Wængonguï anquedo adocä iñömö botö imote ö ænte mäo önömæca iñömö cönongä ongontabopa. Mäniñömö ongönique botö onquiyængä babæcä bai nē guiñëngäa mongænte a ongongä atabopa.

Mäningä mönö guiñëngä opatawæ ëñadongä inte ëmöwocoo tömengä baonga godämæ tömangä yewæmöi ëñacä ingantapa. Mäniwocoo Wængonguï ingantedö ante wënæ wënæ babæ wapiticæ äniwocoo inönimpa. Mäningä mönö guiñëngä nänö ocabocoo önompo æmæmpoque go mä encacä inte tömengä nänö önömoncawæncoo önompo tipæmpoga ëmoncacä ingantapa. 4 Onquiyængä iñömö tömengä weocoo awënëidi waëmoncoo näni mongæncoo tönö opatawæ ëmoncoo mongængantapa. Tömengä, Botö waëmö incæboimpa, ante oodo badöincoo tönö dicamö näni nanguï godonte ænincoo tönö pededamö näni ämö mäniimoncoo mongænte

ingantapa. Tömengä önönempo owætadē oodo inte badöintadē quimæmē baapæ bai i eyede engapæ næængantapa. Mäningä onquiyængä quiēmē nänö wænæ wænæ cæpāmo nänö towente quëwënö bai mänintadē næængantapa. ⁵ Adocä onquiyængä tömengä önönemö inö emöwo yewæmōi emongä ingantapa. Mäniwo wë wodonte bai i incæte iimaï ante impa.

“Babidönia nani waemö quëwëñömö i incæte onquiyængä nē towengä bai impa.

Waadäni nē godö towënäni wäänä bai mäningä onquiyængä ingampa.

Ayæ adobai inguipoga quëwënäni wiwa nani cæinënö ante nē cædäni wäänä bai adocä onquiyængä ingampa.”

Mänömaï tömengä önönemö inö yewæmonte emongantapa. ⁶ Wængonguï quinäni ingainäni tönö Itota ingante ante apænedäni beyæ nē wængainäni tömënäni wepæ bete bai mäningä onquiyængä quidi quidi dowænte bai ingä botö atabopa. Tömengä ingante adinque botö ancai guiñente wætabopa.

⁷ Ancai guiñente wæyömote Wængonguï anquedo botö imote iimaï angantapa. “Quinante ancai guiñente wæbii. Mönö guiñëñongä iñömö tömengä ocabocoo önömpo æmæmpoque go mencaa encacä inte tömengä önömoncawæncoo önömpo tipæmpoga emoncacä inongä inte onquiyængä ingante nē mongængä ingampa. Onquiyængä ingante nē mongængä mönö guiñëñongä tönö onquiyængä tömëna nana wë wodonte ini æbänö i, ante apænebo ëñëe. ⁸ Adocä mönö guiñëñongä bitö adingä iñömö wëenëñedë quëwengaingä inte ñowo

dæ angä incæte ayæ ate tadömengadænguipodë inö ææ ta poncæcäimpa. Ta pöningue tömengä nänö æmæwo ömäe ewenguinque ingæimpa. Wængongui, Quëwenguinta, ante inguipoga badönämaï iñedë nänö yewæmongaintaa inguipoga quëwënäni tömënäni ëmowo në yewæmönämaï inäni iñömö tömënäni iñömö mönö guiñënogä do quëwengaingä ñowo dæ angä incæte ayæ ate pongä adinque ancai guiñente wæcædänimpa,” ante Wængongui anquedo apænecantapa.

⁹ Ayæ tömengä wæætë apænecantapa. “Mäninö ante ëñencæte ante ocai ëñënö në encacä inte ëñencæcäimpa. Mönö guiñënogä tömengä önompo æmæmpoque go mäa ocabocoo iñömö önompo æmæmpoque go mäa änanquidi bai inänipa. Mänii änanquidiboga onquiyängä tæ contacä ingampa. Mänii ocabocoo adobai önompo æmæmpoque go mäa awënë odeyeidi bai inänipa. ¹⁰ Mänimpodäni iñönänite önompo æmæmpoque awënë odeyeidi inänite wido cædänitapa. Adocanque awënë odeye iñömö ñowo aacä ingampa. Wacä awënë odeye ayæ pönämaï ingä incæte tömengä pöningue wantæ iñö ongonte aacæcäimpa. ¹¹ Önompo æmæmpoque go mäa ganca awënë odeyeidi nani cabo iñönänite mönö guiñënogä adocä inongä incæte tömënäni beyæ ponguingä ingampa. Tömengä iñömö wëenëhedë në quëwengaingä incæ ñowo dæ angä inongä inte tömengä nänö æmæwo ömäe ewenguinque poncæcäimpa,” ante Wængongui anquedo apænecantapa.

¹² Ayæ tömengä wæætë apænecantapa. “Ayæ önompo tipæmpoga önömoncawæncoo bitö

adimoncawæncoo iñömö önompo tipæmpoga awënë odeyeidi bai inäni incæte ayæ aadamaï inänipa. Incæte ayæ ate tömënäni inänite änäni ate awënë odeyeidi badinque tömënäni, İimaï cæedäni, ante änäni bacædänimpa. Ayæ mönö guiñenongä tönö tömënäni adoque ooda ganca godongämæ aacædänimpa. ¹³ Tömënäni adodö ante pönënäni inte, Mönö tæi piñænö ante guiñenongä ingante godömö æncæcäimpa. Ayæ awënë odeyeidi inömö inte mönö, İimaï cæedäni, ante nē ämö imö bai mönö tömengä ingante ämö nē angä bacæcäimpa.

¹⁴ “Mäninäni Wængongui Codotedo ingante guädö guëa cæcædänimpa. Incæte tömengä iñömö awënëidi tömänäni Awënë inongä ingampa. Ayæ waodäni awënë odeyeidi iñönänite tömengä Tæiyæ Awënë Odeye inongä ingampa. İinque tömengä tæi emönongä inte tömënäni inänite gänä cæcæcäimpa. Tömengä, Botö miñæ tee empo goquimini, ante waodäni inänite aa pedinque apænte nänö nē ængainäni inte tömengä miñæ cöwë ædæmö cæte tee empo godäni inänipa. Mäninäni adobaï tömengä tönö godongämæ guädö guëa cæte wænonguinäni inte tæi emonte gänä cæcædänimpa,” ante Wængongui anquedo apænecantapa.

¹⁵ Ayæ tömengä wæætë botö imote iimaï apænecantapa. “Onquiyængä mäincoo beyæ towente quëwënonngä inte æpæncoo yædopäa tæ contacä abitapa. Mänii æpæncoo iñömö tæiyænäni waodäni bai inänipa. Wabæca nani quëwencabo wabæca nani quëwencabo incæ wadö nani tedecabo wadö nani tedecabo incæ waodäni tæiyænäni inänipa. Mäninäni tömänäni mänii

æpæncoo bai inänipa. ¹⁶ Ayæ onompo tipæmpoga önömoncawæncoo bai awënë odeyeidi tönö mönö guiñenongä iñömö tömənäni bitö në adinäni inönäni inte onquiyængä maincoo beyæ në towente quëwëngä ingante piincädänimpa. Piïninque, Tömengä ingante æmæwo ömäe ëwengæimpa, ante cæcädänimpa. Tömengä maincoo tömancoo ö ænäni ate ömaacä inte wæyongante tömengä baö cæninque tömengä ingante æmæwo iya tancädänimpa. ¹⁷ Wængongui, Botö angai bai iïnque baganca tömənäni botö pönönö ante cæcädänimpa, ante godö cæcä beyænque mäninäni awënë odeyeidi näni mimönë adodö ante pönänäni. Pönëninque tömənäni godongämæ Ao äninque, Mönö guiñenongä aacæcäimpa, ante tömengä ingante, Mönö tæi piñænö ante godömö ænguingä, ante godönäni ængantapa.

¹⁸ “Mäningä onquiyængä bitö adingä bai Babidönia näni waëmö quëwëñömö adobai impa. Mäniñömö awënëidi iñömö tömämæ awënë odeyeidi inänite në aadäni inänipa,” ante Wængongui anquedo apænecantapa.

18

Babidönia näni quëwëñömö do wo ewente batimpa

¹ Ayæ ate Wængongui anquedo wacä inte öönädë inö wææ pongä atabopa. Tömengä tæi piñængä inte nangui angä ingä inte nämä nänö ñäö apäite emönö inte inguipoga iñömö ñäö apäicä atabopa. ² Tömengä nänö tedepämo inte iïmai yedæ aa pedinque,

“Babidönia nāni āñömö do wo ewente batimpa.
 Babidönia nāni waēmö quëwëñömö i incæte
 do wo ewente ba aedāni.

Badinque wënæidi nāni owoyömö batimpa.

Wënæidi wentamö ewocadāni tōmānāni māniñömö
 tee mōnincōnē bai quëwënānipa.

Ayamōidi baacāidi tōmānāni adobaï māniñömö
 wææ cæte bai owodānipa.

³ Wabæca nāni quëwencabo wabæca nāni
 quëwencabo incæ tōmānāni

babidöniaidi wīwa nāni towëinënö beyæ

tömēnāni biinōmæ bete quidi quidi dowænte bai
 wædānipa.

Inguipoga awënë odeyeidi incæ babidöniaidi tönö
 towënānipa.

Babidönia iñömö quëwënāni nāmanque ante
 pōnente tocæte ante māincoo nanguï pōni
 ænte ëadāni beyænque

inguipoga nē godonte ænāni iñömö māincoo nan-
 guï pōni ëadāni badānipa,”

ante Wængonguï anquedo aa pecantapa.

⁴ Ayæ öönædë inö wacä tedepāmo tedecä
 ëñentabopa.

“Botö guiidēmīni ëñëedāni. Minitö tömēnāni weca
 quëwēmīni incæte,

Tömēnāni tönö godongāmæ wënæ wënæ cædāmaï
 incæmōnimpa, ante cædinque wadæ tao
 pōedāni.

Ayæ, Wængonguï tömēnāni inānite pāninqe mōnitö
 imōnite pānāmaï incæcāimpa, ante pōnente
 wædinque wodii winonte pōedāni.

⁵ Tömēnāni wënæ wënæ cædimāmo iñömö cabo ti
 gæte cōnōninqe bacoo pōni ongompa.

Incæte Wængongui mänināni nāni wīwa cædimāmo
cōwē pōnente wæcampa.

⁶ Tömēnāni nāni pōnōni bai mīnitō tömēnāni inānite
adobai godoncæminimpa.

Tömēnāni nāni pōnō cædinō beyæ mīnitō wæætē
adopo godō cædinque mempoga ganca
godōmenque godō cæmīni wæcædānimpa.

Ti nāmæ godōnāni bete bai wædānitawo. Mīnitō
wæætē tömēnāni owætadē tī nāmæ
adipopæ pe ñiñænte wempo cædēninque,
mempoga pe ñiñænte wempo cædente bai
cædinque godōmenque tī nāmæ godōmīni
bete wæcædānimpa, angantapa.

⁷ Edæ tömēnāni nāmā incæ, Mönō ñænæmō
imompa, ante pōnente nanguī waēmō
māincoo ēate quēwēnāni iñōnānite
mīnitō wæætē, Tömēnāni ægancadō waēmō
quēwēnāni, ante adinque
tömēnāni inānite adoganca pīinte cæmīni
nantate wædinque tömēnāni wæwente
quēwencædānimpa.

Mänināni iñömō, 'Awēnē odeye nänöogængä bai
contate ongōmompā. Edæ watapæ quēwēmō
imompa.

Wii owæmpoingä bai inömō inte wæwēnāmai cōwē
incæmōimpa,' ante önōwēnenque pōnente
ānewēnānipa.

⁸ Mänōmainō ante nē ānāni inte adoque itædē
iñonte tömēnāni nāni wæwēmāmo iñontobæ
pō ate nanguī wæcædānimpa.

Mänionæ tömēnāni nāni wænguimāmo nāni
wæwenguimāmo nāni gue ænenguimāmo
pō wæcædānimpa töö.

Tömänäni onconcoo gonga bæcodocæimpa.

Edæ Wængonguï Awënë iñömö Babidönia iñömö quëwënäni inänite nē apænte ante pangä iñömö edæ tömengä tömää cægaingä ingampa,” ante apænecantapa.

⁹ Inguipoga awënë odeyeidi incæ Babidönia quëwënäni tönö towënäni inte tömënäni adobaï Babidönia quëwënäni tönö nanguï waëmö mäincoo godongämæ ænte èate quëwënänipa. Ìninqe Babidönia nāni quëwëñömö gonga bæcododinqe tēemancoo baca baca æi adinqe tömënäni wæwente Ca ca wæcædänimpa. ¹⁰ Babidönia iñömö quëwënäni nanguï pönï nāni wæwënö adinqe awënë odeyeidi ancai guïñëninque, Mänināni tönö godongämæ wæwënāmaï incæmönimpa, ante gomonga a ongöninqe wæcædänimpa.

“Babidönia mīni waëmö quëwëñömö nē quëwëmīni mīni wæquinque ingæimpa.

Mänïñömö quëwëmīni mäincoo nanguï èate inīmīni inte mīni wæquinque.

Wënæ wënæ cæmīni iñömīnite adoque ooda iñonte Babidönia mīni quëwëñömö do apænte pante wo ëwente batimpa.” ante wæcædänimpa.

¹¹ Inguipoga mäincoo ænte mante nē godonte ænāni iñömö, Edæ æcänö mönö godonguënenco godonte ænguīnaa. Nōwo dæ ä, ante wæwente Ca ca wæcædänimpa. ¹² Ìncoo iñömö nāni godonguënenco impa. Oodo tönö padata, dica nāni nanguï godonte ænincacoo tönö pededamö nāni ämoncoo mæ ongoncoopa. Adobaï waëmoncoo nīno nāni ancoo tönö awënëidi waëmoncoo

näni mongæncoo ayæ teda näni ancoo tönö opatawæ incoo mæ ongoncoopa. Quiwæmë ogui wawænque i mäniwæ mæ ongoncoopa. Edepante бага inte näni badönincoo tönö awænque näni nangui godonte æniwæ inte näni badönincoo mæ ongoncoopa. Yaëmenta bodonte näni äni inte näni badönincoo tönö iædo näni äni inte näni badönincoo tönö mänömodo näni anca inte näni badönincoo iñömö mänincoo tömancoo mæ ongoncoopa, ante wæcæðänimpa. ¹³ Cäna näni antapo tönö ogui waa öni pæcaqui, ogui waqui näni iya täimö tönö ti nä öni pæqui ayæ ogui wapæ öni pæquimæ, biinömæ tönö oginguipæ, waëmö æðina tönö todigomö mänincoo mæ ongoncoopa. Cæningäidi tönö obegaidi cabayoidi tönö cabayo inte ñä cæte näni wëä godö awotocoo mæ ongoncoopa. Mänincoo tömancoo mæ ongoncoopa, ante wæcæðänimpa. Ayæ adobai, Waodäni incæ nê cæte quëwencæðänimpa, ante cæningäidi bai godonguënëmö intamompa, ante wæcæðänimpa. ¹⁴ Mäninäni Babidönia quëwënäni inänite iimaï ancæðänimpa.

“Quincamë ante beinente wæmini incæ mäninca tömanca minitö weca ñowo dæ ancapa.

Mini ëadincoo tönö quinö waëmö mini mänincoo iñömö mänincoo tömancoo ñowo dæ ä inique minitö

ömæpomini inte cöwë wæætë ænämaï incæminimpa,” ante ancæðänimpa.

¹⁵ Tömënäni mäniñömö quëwënäni inänite mänincoo näni godönincoo beyæ nê æninäni inte nê nangui ëadinäni incæ Babidönia iñömö quëwënäni näni wæwënö adinque, Mäninäni tönö

godongämæ wæwēnāmaī incæmönimpa, ante gomonga a ongöningue ancai guiñencædänimpa. Ayæ wæwente Ca ca wæcædänimpa. ¹⁶ Ayæ iīmaī yedæ ancædänimpa.

“Babidönia mīni waēmō quēwēñömō nē quēwēmīni incæ mīni wæquinque ingæimpa.

Edæ māniñömō quēwēmīni tōmēmīni weocoo waëmoncoo nīno nāni ancoo tönō awēnēidi waëmoncoo nāni mongæncoo tönō opatawæncoo mānincooque mongæmīni imīnitapa.

Minitō, Mönō waēmō incæmōimpa, ante oodo inte badöincoo tönō dicamō nāni nanguī godonte ænincoo tönō pededamō nāni ämō mānimoncoo mongæmīni imīnitapa.

¹⁷ Incæte adoque ooda iñonte mānincoo mīni äadincoo incæ edæ æmæwo ömæe ewente batimpa, ante nē ænte godönāni edæ wæcædänimpa,” ante angantapa.

Æpæntibædo wipocoo nē tōö tōö cædönāni tönō, Wipodē nē godāni, wipodē nē cædönāni tönō, Wipo inte māincoo godonte ængæimpa, ante nē māo godāni tōmānāni mānināni gomonga a ongoncædänimpa. ¹⁸ Babidönia nāni quēwēñömō gonga bæcododique tēēmancoo baca baca æi adinque iīmaī yedæ ancædänimpa, “Iī Babidönia nāni waēmō quēwēñömō bai wayömō nāni waēmō quēwēñömō edæ dæ ampa, ante wæcædänimpa,” ante angantapa. ¹⁹ Nē wæwēnāni inte nāni cæi bai onguipo guidimō ænte ocaboga wo ææntodonte wææ guicadique Ca ca wædinque iīmaī yedæ ancædänimpa,

“Babidönia nāni waēmō quēwēñömō nē quēwēnāni
nāni wæquinque ingæimpa.

Māniñömō æpæntibædo wipocoo nē ēadāni inte
tömēnāni nāni godōnincoo māniñömō quēwēnāni
inānite godonte æninque tōmānāni nanguī
ēadāni badānitapa.

Ayæ adoque ooda iñonte Babidönia nāni
quēwēñömō tōmāo æmæwo ömæe ewente
batimpa, ante ancædānimpa,” angantapa.

²⁰ Māninö ante änāni ate, Tōmāmīni öönædē iñömō
quēwēmīni māniñömō wo ewente i adinque
watapæ tocæmīnimpa.

Wængonguī quīmīni adobāi
Itota nänö nē da godongaīmīni tönö
Wængonguī beyæ nē apænemīni tönö
mīnitö tōmāmīni māniñömō wo ewente i adinque
watapæ tocæmīnimpa.

Edæ, Mīnitö imīnite æbänö wēnæ wēnæ cædāni,
ante adinque

Wængonguī tōmēnāni nāni quēwēñömō quēwēnāni
inānite apænte āninque pangā ate
tocæmīnimpa, ante angantapa.

²¹ Ayæ Wængonguī anquedo nē tæi emongā
iñömō dicabo nāni mö mö equinca bai ñænængade
dicabo æninque æpæntibæ cæncadēmæ wo gui-
itodōninque iūmaī angantapa.

“Māninca æpæntibæ cæncadēmæ tæi wo
guiitodōmo guī bai

Babidönia nāni waēmō quēwēñömō
wo ewente dæ ba ate cōwē adāmaī incædānimpa.

²² Īninque, Adapate nāni ampogainö incæ
āmotamīni nāni angainö incæ

ööña bai nani we we öongainö incæ todompeta
nani ancadeca nani we we öongainö incæ
mäniñömö cöwë ëñënamai ingæimpa.

Quiëmë badönäni incæ në badongainäni
mäniñömö cöwë dæ ancädänimpa.

Tömënëni nani dicabo mö mö equinca inte
cæyönäni dicabo dadi dadi cæyedë ä bai
mäniñömö cöwë wii ëñenguinänidö angüënë.

²³ Do nani ti wodönoincade mäniñömö cöwë tica
ënënamai ingæimpa.

Onquiyængä ingante në monguingä mäniñömö
cöwë dæ ä mönämäi inguinänidö angüënë.

Mäniñömö mäincoo ænte mante në godonte
ænäni iñömö inguipoga ñænænäni inte
ongongadänimpa.

Ayæ idöidi yewænte bai cædinque mäniñömö
quëwënäni, Waëmö mäincoo, ante wapiticæ
änewënäni beyænque wabæca nani
quëwencabo wabæca nani quëwencabo
incæ tömänäni nani quëwencabo oda cæte
gogadänimpa,” angantapa.

²⁴ Wængongui beyæ në apænegaïnäni inänite
wænöninque mäniñömö quëwënäni incæ
Wængongui quinäni inänite godömenque wænönäni
wængadänimpa. Edæ inguipoga wænönäni në
wængainäni tömänäni mäniñömö wænönäni wænte
bai ingadänimpa.

19

¹ Babidönia wo ewente ba ate öönädë iñömö
waodäni tæiyænäni adotedæ ogæ tededäni bai
ëñentabopa.

“Mönö Awënë ingante watapæ apænecæimpa,
ante, Adedoya, äninque,
Mönö Wængongui mönö imonte, Quëwencæminimpa,
ante nē Ængä inongä ingampa.

Tömengä ñäö emongä inongä ingampa. Ayæ
tömengä tæi piñægä inongä ingampa.

² Edæ, Wængongui, Iimaï pancæboimpa, ante nänö
apænte angainö bai cædinque tömengä cöwë
nö cæte waa pangampa.

Babidönia iñömö onquiyægä maincoo beyæ nē
towente quëwënogä bai impa. Mäniñömö
quëwënäni nē wiwa cædäni beyænque
inguiipoga quëwënäni wæætë nē wiwa cædäni
badäni adinque

Wængongui mäniñömö quëwënäni inänite apænte
ante pangantapa.

Wængongui ingante nē cædinäni inänite adodäni
wænönäni adinque tömengä wæætë
tömënäni inänite wænogä wænänitapa,”
ante änänitapa.

³ Ayæ wæætë ogæ tededinque,
“Adedoya,” änänipa.
“Mäniñömö tēmancoo cöwë baca baca æicöompa,”
ante änänitapa.

⁴ Mäniñedë Wængongui nänö tæ contaimpaa
tæ contayongante nē aadäni nē Picænäni
bæinticoatodo ganca inäni tönö münäni quëwënäni
mënaa go mënaa inäni iñömö ædæ wææninque,
Bitö Wængongui Awënë imidö anguënë,
äninque “Amëë, Adedoya,” ante aa pedänitapa.

⁵ Wængongui nänö tæ contaimpa inö tedepämo
iimaï tededinque,
“Wængongui ingante nē cæmini inte

tömengä ingante nē guiñente eñente cæmīni iñömō
 nē awēnēidi imīni incæ önömīnique incæ mīnitō
 tōmāmīni,
 Mönō Wængonguī ingante watapæ apænecæimpa,
 ante apæneedāni,” angantapa.

Wængonguī Codotedo monguingä ææmæ

⁶ Ayæ adobaī waodāni tæiyænāni adotedæ ogæ
 tededāni baī eñentabopa. Ñænæ tēñabo ä baī
 detæbo eyequei tē baī eñentabopa.

“Adedoya,

Mönō Wængonguī Awēnē Tömää nē Cægāimi inte
 bitō nē Awēnē badinque aabipa.

⁷ Mönō watapæ pōni entawēninque waa tocæimpa.
 Edæ tömengä ingante apænedinque mönō, Bitō
 ñäō emōmi imipa, ante angæimpa.

Edæ Wængonguī Codotedo nänö monguinö oo
 bacæ cæpa cæmīni.

Onquiyængä tömengä ingante monguingä
 iñömō, Botō nänöogængä inguingä oo
 poncæcæimpa, ante nāmā incæ eyepæ cæte
 ä ongongampa.

⁸ Tömengä ingante weocoo nīno nāni ancoo waēmō
 näämæntacoo

nänö wēñaquincoo, ante pönönāni ængä ingampa.

Wængonguī quīnāni nāni nö cægaincoo incæ
 nīno nāni ancoo waēmō näämæntacoo baī impa.”

⁹ Ayæ Wængonguī anquedo botō imote angan-
 tapa. “Īmaī ante yewæmōe. ‘Wængonguī Codotedo
 monguingä ææmæ pō becædānimpa, ante wente
 ængä nē ponguināni nāni toquinque.’ ” Tömengä
 ayæ godömenque äninque, “Mäninö Wængonguī
 nänö nö angainö impa,” ante angantapa.

10 Ante añongä botö tömengä önöwa inö ædæ wææninqe tömengä ingante watapæ apæneceæte ante cæyömote tömengä wæætë, “Mänömaï cædämaï imäwe, angantapa. Botö önonque bitö bai Wængongui ingante në cæbo imopa. Edæ bitö töninädäni Itota nänö apænegainö në eñente cædäni bai botö adobai Wængongui ingante në cæbo imopa cæbii. Edæ Wængonguinque ingante ædæ wææninqe, Bitö Wængongui Awënë imidö anguënë, ante apænee,” ante angantapa.

Itota godö odömongä beyænque Wængongui beyæ në apænedäni inömö tömengä nänö apænegainö ante ewocadinque apænedänipa.

Näämænta cabayoga në tæ contacä mongænte pongampa

11 Botö ayæ ayömote öönæde wi ænete bai bayö cabayo näämænta eñacä a ongongä atabopa. Cabayo në tæ contacä mongænte pongä inongante, Tömengä cöwë pönëinqe në Ædæmö Cædongä inte, Näwangä impa, ante në Apænegaingä ingampa, ante pemonte ingampa. Wænæ wænæ cædäni inänite tömengä nö apænte ante pänongä ingampa. Ayæ guëadö guëa cædinque tömengä në nö cædongä ingampa. 12 Tömengä awinca gonga bæcodote bai emongä inte tömengä ocaboga pogantacoo encacä ingampa. Tömengäa emöwo yewæmante ii incæte mänïwo tömenganque nänö eñëwo impa. Wädäni ædö cæte eñenguinänii. 13 Tömengä weocoo yacoo wepænë guipænente mongængampa. Tömengä emöwo inömö, Wængongui nänö Angainö, ante pemonte ingampa.

14 Öönædē iñömö tontadoidi tömengä miñæ tee empote godänipa. Tömēnāni nīno nāni ancoo waēmō nāāmēntacoo mongæninque cabayoidi nāāmēnta ēñadāni yabæ tæ contate mongænte godänipa. 15 Cabayoga nē tæ contacā iñömö wabæca nāni quēwencabo wabæca nāni quēwencabo incæ waodāni inānite yaēmenca pancæte ante ānīnque tömengä önönē inö yaēmē tipængaa waingamē engamē ēnedinque yædæ tadete ongongantapa. Tömengä iñömö nē tæiyæ awēnē tömengä nempo quēwēnāni inānite aacā bai adobai tömāmæ quēwēnāni inānite, Īimaī cæedāni, ante aacæcāimpa. Yowepæ ante yowecoo nāni pīnā pīnā gāwate cæincadedē pīnā pīnā gāwate bai cædinque cabayoga nē tæ contacā Wængonguī ænguī nänö angainö beyænque iñömö tömēnāni inānite piinte pancæcāimpa. Wængonguī adocanque Tömāā nē Cægaingä ingampa. 16 Cabayoga nē tæ contacā iñömö weocoo yacooga adobai tömengä önontiya ĩi emōwo yewæmonte ēñacampa. “Ayæ waodāni awēnē odeyeidi iñönānite tömengä Tæiyæ Awēnē Odeye inongä ingampa. Tömengä iñömö awēnēidi tömānāni Awēnē inongä ingampa,” ante pemonte ingampa.

17 Ayæ wacā Wængonguī anquedo nænque cæncadēmö inö a ongongä atabopa. Tömengä öönædē gāmænö nē cæwodāni tömānāni inānite yedæ ante aa pedinque, “Adoyömö godongāmæ pōedāni. Edæ Wængonguī tæiyæ ææmæ ante pō cæedāni. 18 Awēnē odeyeidi incæ tontado capitäoidi incæ onguīñænāni tæi piñænāni incæ cabayoidi incæ cabayocooga inte nē tæ contate

godäni incæ iinäni tömänäni wænäni ate tömënäni baö cæncæte ante pöedäni. Waodäni awënë beyænque nê cæte quëwënäni incæ nê nämä cæte quëwënäni incæ awënëidi incæ önönäni que incæ tömänäni baö pö cæedäni,” ante aa pecantapa.

¹⁹ Ayæ botö ayömö mönö guiñëongä tönö inguipoga awënë odeyeidi tönö tömënäni tontadoidi tönö adoyömö godongämæ pöningue, Cabayoga nê tæ contacä ingante ayæ tömengä tontadoidi inänite mönö guëadö guëa cæcæimpa, ante cædäni atabopa. ²⁰ Incæte guëadö guëa cæyönänite tömënäni näëmæ mönö guiñëongä ingante bæi ongöningue, Wængongui beyæ nê apænebo, ante nê babæ äningä ingante adobaï bæi ongönänitapa. Nê babæ äongä iñömö mönö guiñëongä beyænque mä pönï cæcä inongäimpa. Inique mönö guiñëongä tömengä nänö yewæmöi nê yewæmöinäni iñömö tömengä nänö ëmönö baï näni badöinca gäänë ædæ wææningue nê apænedäni inte tömënäni nê babæ äongä nänö mä cædö adingue guiñente wædingue oda cædönänipa. Inique mönö guiñëongä tönö nê babæ äongä ayæ miina quëwëñö nate atopode näni änantibæ gonga baï näni bæcodotibæ cæncadëmæ wido cædänitapa. ²¹ Tömëna miñæ pönäni inänite guiquënë cabayoga nê tæ contacä tömengä önönë inö yaëmenca yædæ tadete ongöningue do wænungä wænänitapa. Inique nê cæwodäni baö ade cænänique tömänäni nê wænünäni baö tömo pönï cæwënönäni inänitapa.

Miido wadepo iñonte æbänö baquü

¹ Wængonguü anquedo wacä iñömö tadömengadænguipo ontatodemö wi ænequi tönö ñänömencaimë ñænæmë önönempo næængä inte öönæde inö ta wæængä atabopa. ² Ta wææninqe tömengä dadagöö ingante bæi ongöninge tömengä nänö miido wadepo ganca ñä cæyænte ongonguinque ante ñä cæyængantapa. Mäningä dadagöö wëenëñedë tæntæ në ingaingä inte wënæ awënë Tatäna ingacäimpa. ³ Mäningä ingante ñä cæyæninque tadömengadænguipodë wido cædinque ontatodemö wi ænequi inte tee mönedinque tömengä dæca ontatodemö ædæmö tee moncacantapa. Waodäni wabæca nani quëwencabo ayæ wabæca nani quëwencabo iñönänite tömengä, Oda cæte gocädänimpa, ante miido wadepo ganca cädämaï incæcäimpa, ante Wængonguü anquedo dadagöö ingante wido cæcantapa. Mänimpodepo iñque ba ate tömengä ingante, Wantæ iñö ñimpo cæte goquingä, ante ñimpo cæcä gocæcäimpa.

⁴ Ayæ awënëidi tæ contaimpacoö botö atabopa. Wængonguü Awënë godö angä beyænque awënëidi badinque apænte ante në änäni badinäni inte mänimpaa tæ contadäni inänitapa. Ayæ Itota ingante ante apænedinque Wængonguü nänö angainö ante apænedäni beyænque tömënäni inänite wangö tamencadäni wængadänimpa. Wangö tamencadäni wængainäni nani önöwocaidi botö ñöwo atabopa. Mäninäni iñömö mönö guiñenongä ayæ pöningä ingante adinque, Bitö Wængonguü Awënë bai imidö anguënë, ante apænedämaï inte ayæ tömengä nänö emönö bai

näni badöinca gäänē ædæ wæænte apænedämaï ingadänimpa. Ayæ tömēnāni näni önönemö inö näni önompö inö mönō guiñēnongä ayæ pöningä nänö yewæmōi yewæmönāmaï ingadänimpa. Adodāni ñāni ömæmöninque adoque müido wadepo ganca Itota Codito tönö godongämæ aadänitapa.

⁵ Mänināni täno ñāni ömæmönāni incæte wadāni guiquēnē nē wængaināni incæ müido wadepo iinque go ate ñāni ömæmoncädänimpa. ⁶ Täno ñāni ömæmönāni iñömö nē tæiyæ waemö ināni inte näni toquinque. Edæ wadāni nē wængaināni mempoga ganca näni wænguimāmo iñonte mänināni iñömö wænāmaï incädänimpa. Wæætē, Wængonguï quï, ante nē godönāni bai tömēnāni adobai, Wængonguï beyæ, ante ayæ, Itota Codito beyæ, ante cæcädänimpa. Ayæ müido wadepo iñonte Itota Codito tönö godongämæ aacädänimpa.

Tatāna nänö æmcæwo ömæe ewenguinö ante

⁷ Tadömengadænguipodē tömengä nänö tee mönecönē ñā cæyænte quēwēnongä iñongante Tatāna ingante müido wadepo iinque go ate ñi cæyænāni ta gocæcäimpa. ⁸ Ta godinque tömengä inguipoga æmatæ go æmatæ go godinque Gogobæ näni ämæ ganca go Mäogobæ näni ämæ ganca gocæcäimpa. Inguipoga tömäo godinque tömengä, Wabæca näni quēwencabo ayæ wabæca näni quēwencabo näni oda cæte goquimāmo ante cædinque tömēnāni inänite, Mönō guēadō guëa cæquinque gocæimpa, ante, Adoyömö godongämæ pödāni, ante ancæcäimpa. Æpodänidö ināni, ante tömēnāni æpæ wedeca emönai bai tæiyænāni inguinänidö anguēnē.

9 Mäninäni bogænæ tömäo godäni bai tömënäni adobaï inguipoga tömäo gocædänimpa. Wængonguï nänö waadete quëwëñömö tömengä quinäni quëwëñömö godämæ gocædänimpa. Goyönäni öönädë inö gonga bæcodote gao wææñonte gonte wæncædänimpa. 10 Ayæ wënæ tömënäni inänite, Oda cæte gocædänimpa, ante në cægaingä ingante Wængonguï bæi ongonte atopode näni änontibæ gonga bai näni bæcodotibæ cæncadëmæ wido cæcæcäimpa. Edæ mönö guiñëngä tönö, Wængonguï beyæ në apænebo, ante në babæ äningä tönö tömëna dobæ mäniñömö wido cæte ingadainpa. Inique mäninäni itädë woyowotæ mäniñömö quëwente cöwë wantæpiyæ näni wæwenguimämo ingæimpa.

Wængonguï Awënë tæ containpa näämæntapa

11 Ayæ awënë tæ containpa ñænæmpa näämæntapa adinque botö mänimpaa në tæ contacä ingä adobaï atabopa. Inguipoga tönö öönæ iñömö tömengä ingante ate bai cædinque wodii godinque nana ongöñömö edæ ædömë gote dæ änimpa.

12 Ayæ në wængainäni tömänäni awënëidi incæ önönänique incæ mänimpa gäänë a ongönäni atabopa. A ongöñönäni mincayontacoo wataa wataa wi æmpote ongoncoopa. Ayæ mincayonta wataa Wængonguï, Quëwenguinta, ante tömengä yewæmongaintaa wi æmpote acantapa. Mänii mincayontacoo iñömö, Në wængainäni tömänäni æbänö cægainäni inäni, ante Wængonguï mänintacoo nänö yewæmongainö ante wataa wataa tömanta adinque në wængainäni näni cægai

ganca, ante tömēnāni inānite adoganca apænte ante pangantapa. ¹³ Ayæ æpæntibæ cæncadēmæ do wængaināni wæætē ta pönānitapa. Æmæwo wængaināni incæ ta pönānitapa. Tömēnāni nāni wænte ongōñömō nē ongongaināni inte wadæ ta pönānitapa. Ta pönāni ate, Æbānō cægaināni inānii, ante adinque Wængonguī adocanque adocanque nänö cægaī ganca, ante tömengä ingante adoganca apænte ante pangantapa.

¹⁴ Māniñedē ganca ayæ baganca wænāmaī quēwencädānimpā, ante ayæ, Wængaināni nāni ongōñömō adobaī dæ bacæimpā, ante cædinque mönō Awēnē wængaināni æmæwo nāni wængaimāmo tönō nāni wænte ongōñömō æpæntibæ gonga baī nāni bæcodotibæ cæncadēmæ wido cæcantapa. Mānintibæ mempoga ganca æmæwo nāni wænguimāmo baī impā.

¹⁵ Wængonguī, Quēwenguīnta, ante nänö yewæmongaintaa adinque, Æcānō emōwo mānintaa yewæmönāmaī i, ante adinque nē yewæmönāmaī ingaināni inānite mānintibæ cæncadēmæ wido cæcantapa.

21

Inguipoga münguipo öönæ müönæ

¹ Ayæ öönæ müönæ inguipoga münguipo atabopa. Edæ öönæ picæönæ inguipoga picænguipo dæ iinque batimpa. Ayæ æpæntibæ adobaī dæ änimpā. ² Ayæ godömenque botö ayömote Wængonguī nänö tæiyæ waemö quēwēñömō müi Eedotadēē nāni añömō öönæde inö ta wææ atabopa. Onquiyængä nē moncæ cæcä iñömō, Botö nänöogængä inguingä waa

acæcäimpa, ante waëmö weocoo nē mongængä bai iï quëwëñömö adobaï waëmö pönï emö inte ta wææ atabopa.

³ Ayæ Awënë tæ containpa inö tedepämo yedæ ä ëñentabopa. “Ñöwo Wængongui nänö owoquincö waodäni weca ongö inique tömengä tömënäni tönö quëwengungä ingampa. Tömënäni tömengä guidënäni bacædänimpa. Ayæ Wængongui incæ, Botö tömëmo munitö Wængonguimo incæboimpa, ante tömënäni weca ongoncæcäimpa. ⁴ Tömënäni wëñapæ tamonte wædi tömämæ Wængongui wadæ cæmoncæcäimpa. Mänïñedë æmæwo mönö wænimämo incæ mönö wæwënimämo incæ Ca ca mönö wædimämo incæ nantate mönö wædimämo incæ tömäa mänimämo dæ angæimpa. Edæ wëenëñedë inimämo incæ inique batimpa,” angantapa.

⁵ Ayæ Awënë tæ containpaa nē tæ contacä iïmaï angantapa. “Tömää inimämo botö ñöwo müi cæcæboimpa,” angantapa. Ayæ, “Mänömainö ante botö äninö edæ nö pönï iï inique mäninö ante wede pönengæimpa. Mänömaï beyæ bitö iïmaï ante yewæmöe,” angantapa.

⁶ Ayæ tömengä wæætë botö imote iïmaï äninque, “Dobæ inique batimpa. Botö Tänobo ingaïmo inte Tömämo inguïmo imopa. Wëenëñedë tömäa nē Badongaïmo inte tömäa nē inique Cæbo incæboimpa. Edæ nē gæwænäni, Æpæ beinëmönipa, ante nē änäni inänite botö æpæ tapæ quëwenguimä önonque godömo becædänimpa. ⁷ Tæi emonte nē gänä cædäni inänite botö mänincoo botö nē godonguincoo godömo æncædänimpa. Ayæ botö incæ tömënäni Wængonguimo incæboimpa.

Tömänäni wæætē botö wēñænāni bacædānimpā.
 8 Wæætē guiñente awædö, ante nē änāni tönö
 nē pönēnāmaī ināni guiquēnē, nē wiwa cædāni
 tönö wacā ingante nē wænōnāni guiquēnē, nē
 towente quēwēnāni tönö idōidi nē ināni guiquēnē,
 Wængonguī impā, ante nāni badōnincā gäänē ædæ
 wææninque nē apænedāni tönö nē babæ änāni
 tōmānāni guiquēnē, mānināni iñōnānite atopode
 nāni änontibæ gonga baī nāni bæcodotibæ incæ
 tōmēnāni nāni wæcōñömö bacæimpā. Mänii
 nāni wænguimāmo iñömö mempoga ganca nāni
 æmæwo wænguimāmo impā,” angantapa.

Mü Eedotadēē quēwēñömö

9 Wængonguī anquedoidi önompo æmæmpoque
 go mēa ganca ināni önompo æmæmpoque go
 mēa ganca owætacoo waodāni iinque nāni
 wæwenguimāmocoo eyede engate intacoo nē
 næænāni iñōnānite adocanque botö weca
 pōninque, “Pöe,” angantapa. “Wængonguī
 Codotedo nänöogængä nē baquingä nē monguingä
 iñongante botö bitö imite odömömo acæbiimpā,”
 angantapa. 10 Ayæ Wængonguī Önōwoca incæ botö
 imote bæi ongonte baī cæyongante botö wiiimonte
 baī iimaī atabopa. Wængonguī anquedo botö imote
 ö ænte māo onquiyaboga tæcædæca pōni cōnongä
 ongonte ayömo Wængonguī tæiyæ waemö nänö
 quēwēñömö Eedotadēē nāni äñömö öönæde inö ta
 wææñonte tōmengä botö imote odömongä atabopa.

11 Mänii quēwēñömö Wængonguī ñäö emōnongä
 baī apäitimpā. Ayæ dica aatapeca nāni anca
 emö baī awocawænta baī waëmonca inimpā.
 Waodāni nāni nanguī godonte ænincā baī

ñäö apäite bai Eedotadëë inimpa. ¹² Mänii quëwëñömö godämæ tæimö wææ cædi ænöwæmö ongönimpa. Ayæ wææ cædi odemoncoo iñömö önompo tipæmpoga go mënemonga wææ cædinemö inimpa. Önompo tipæmpoga go mëa ganca wææ cædinemö incæ wayömö adodemonque Wængongui anquedo adocanque a ongöñongä wayömö adodemonque Wængongui anquedo a ongöñongante anquedoidi önompo tipæmpoga go mëa ganca ongönänitapa. Mäninemö önompo tipæmpoga go mënemonga odemoncooga idægoidi nani cabo tipæmpoga go mencabodäniya iñönänite tömëni emöwocoo yewæmonte inimpa. Wayömö odemonga adocaboque emöwo wayömö odemonga adocaboque emöwo yewæmonte inimpa. ¹³ Nænque tamönö inö mëa go adoque odemö inimpa. Nænque wæidö inö mëa go adoque odemö inimpa. Betamonca inö mëa go adoque odemö inimpa. Adobai æmatæ inö mëa go adoque odemö inimpa. ¹⁴ Mänii quëwëñömö wænömënæca mænonte wææ cæqui, ante nani ñönönincacoo iñömö önompo tipæmpoga go mencaa inimpa. Mänincacoo önompo tipæmpoga go mencaa incæ Wængongui Codotedo nänö da godongainäni önompo tipæmpoga go mënäa inäni tömëni emöwo incæ adocanque emöwo wacaa adocanque emöwo wacaa yewæmonte ëñacaimpa.

¹⁵ Wængongui anquedo botö imote në apænedingä iñömö tee manguimpa oodo inte badöimpa në næængä atabopa. Mänii quëwëñömö tee mancæte ante mänii wææ cædinemoncoo adobai tee mancæte ante mänii wææ cædi adobai tee mancæte ante tömengä tee manguimpa

næængantapa. ¹⁶ Mänii quëwëñömö æmataæ adoganca æmataæ adoganca mænonte inimpa. Doyæ inö betamonca inö adoganca inimpa. Tömengä mänii quëwëñömö tee manguimpa inte tee mante doyæ inö ænōwæmō inö doo miido dootiento quidōmetodo ganca inimpa. Ayæ betamonca iñömö adobaï doo miido dootiento quidōmetodo ganca i atabopa. ¹⁷ Wængongui anquedo waodäni nani tee mänö bai tee mangä ayongä mänii quëwëñömö wææ cædi tæinebo inö tetenta i coatodo mēetodo ganca inimpa.

¹⁸ Mänii wææ cædi aatapeca nani änonca inte mænōni impa. Mänii quëwëñömö guiquënë oodo inte awocawænta bai waëmō inte mænōni impa. ¹⁹ Mänii quëwëñömö wænōmënæca mænonte wææ cæqui, ante ñönōnincacoo iñömö, Waëmō emongæimpa, ante tōmënāni quincacoo nani nanguï godonte ænincacoo ænte māmō ñönōnincacooga bewodö bewodö cædänitapa.

Tänoca ñönōninca aatapeca nani anca inimpa.

Waca ñönōninca guiquënë tapidoca nani anca inimpa.

Waca ñönōninca guiquënë aagataca nani anca inimpa.

Waca ñönōninca guiquënë etemēnaotaca nani anca inimpa.

²⁰ Waca ñönōninca guiquënë oöninteca nani anca inimpa.

Waca ñönōninca guiquënë codōnadīnaca nani anca inimpa.

Waca ñönōninca guiquënë coditooditoca nani anca inimpa.

Waca ñönöninca guiquënë bedidoca nani anca
inimpa.

Waca ñönöninca guiquënë topatioca nani anca
inimpa.

Waca ñönöninca guiquënë coditopadataca nani
anca inimpa.

Waca ñönöninca guiquënë aatintoca nani anca
inimpa.

Waca tömanca guiquënë amatitaca nani anca inimpa.
Mänimpoca inimpa.

²¹ Mänii wææ cædinemö iñömö önompo
tipæmpoga go mënemonga iñömö pededamö nani
ämö önompo tipæmpoga go mëmonga inte mænonte
inimpa. Wææ cædinemö incæ wææ cædinemö
incæ pededamö adomonque adomonque inte
mænöninemö inimpa. Mänii quëwëñömö taadö
ñænænö godö oodo inte mænöwate taadö
awocawænta bai waëmö inimpa.

²² Mönö Wængongui Awënë adocanque Tömää
në Cægaingä tönö Wængongui Codotedo tönö
mäniiñömö cöwë ongöna inique godongämæ
quëwënäni guiquënë, Mönö Wængongui oncönë
guicæimpa, ante quinante anguinanii. Edæ
Wængongui tæiyæ waëmö oncö mäniiñömö dæ
ä atabopa. ²³ Wængongui në ñäö bai ëmönongä inte
ñäö apäiquingä bai inongäimpa. Ayæ Wængongui
Codotedo iñömö nani ti wodönoincade bai i
inique mänii quëwëñömö iñömö nænque incæ
apäicä incæ quinante godömenque ñäö apäiquii.

²⁴ Wabæca nani quëwencabo ayæ wabæca nani
quëwencabo inänite Wængongui ængä beyænque në
quëwënäni inte mäninänique mänii ñäö apäiyömö
cægoncædänimpa. Adobai inguipoga awënë

odeyeidi waëmoncoo nani ëadincoo mänïñömö ænte poncædänimpa.

²⁵ Mänïi quëwëñömö woyowotæ inämaï ingæïmpa. Ìninqe mänïñömö wææ cæðinemoncoo iimö iñö iimö iñö iñonte cöwë tee mönedämaï ingæïmpa. ²⁶ Wabæca nani quëwencabo ayæ wabæca nani quëwencabo incæ tömënanï waëmoncoo nani ëadincoo mänïñömö ænte poncædänimpa. Mänïi quëwëñömö waa quëwëñömö impa, ante waa ate apæñecædänimpa. ²⁷ Quiëmë wënæ wënæ i mänïñömö cöwë guidämaï ingæïmpa. Në wiwa cæðani incæ në babæ änani incæ mänïi quëwëñömö guidämaï inguinänidö angüënë. Wæætë Wængongui Codotedo, Quëwenguintaa, ante nänö yewæmointaa në yewæmönani guiquënë tömënanique guicædänimpa.

22

¹ Ayæ Wængongui anquedo botö imote önö quëwenguimæ odömongä atabopa. Mänimæ awocawænta bai waëmömæ impa. Wængongui tönö Wængongui Codotedo nana aacæ tæ containpa inö tapæmpa. ² Mänïñömö tadinque mänïi quëwëñömö taadö ñænænö godö tæcæguedë inö ta gopæmpa. Mäninö æmæ wedeca incæ imæ wedeca incæ awæ quëwenguiwæ pæwæ atabopa. Mäniwæ iñömö tömenca wacä apäicä iñonte wacä apäicä iñonte incapa. Ìninqe adoque wadepo iñedë önompo tipæmpoga go mäa ganca mänimpoga mäniwæ incayedë impa. Wabæca nani quëwencabo ayæ wabæca nani quëwencabo incæ mänimæca quëwënanï tömänani

mäniwæ öñabocoo beyæ gançæ bacædänimpa, ante eñabocoo. ³ Wængongui pante nänö angainö beyænque quincoomé wænæ wænæ bagatii mäninö mäniñedë dæ angæimpa. Wængongui tönö Wængongui Codotedo nana aacæ tæ containpa manii quëwëñömö mä ongoncæpaimpa. Tömengä ingante në cædönäni iñömö tömengä ingante watapæ apænedinque tömengä ingante cæcædänimpa. ⁴ Tömengä awinca acædänimpa. Ayæ tömengä emöwo tömënäni önönemö inö yewæmonte incædänimpa. ⁵ Mäniñömö woyowotæ inämaï ingæimpa. Edæ mäniñömö quëwënäni beyæ Wængongui Awënë në ñäö emönongä inte apäiuingä inongampa. Ìinque nænque ñäö apäidö incæ ti wodönoincade ënënö incæ quinante ayæ apäiquii. Ayæ mäniñömö quëwënäni adodäni cöwë wantæpiyæ aacædänimpa.

Itota Codito oo poncæcäimpa

⁶ Ayæ Wængongui anquedo botö imote apænedinque, “Mäninö bitö eñënö nö pöni i ìinque mäninö ante wede pönengæimpa. Wængongui beyæ në apænedönäni tömengä Önöwoca ingante ewocadinque apænedänipa. Tömënäni nani në ewocadongä Wængongui Awënë iñömö tömengä anquedo ingante apænedinque, Bitö botö imote në cædönäni weca godinque, Æbänö oo pöni baquimpa, ante odömömi acædänimpa, ante da pönongä pongantapa,” ante botö imote apænecantapa.

⁷ Itota Codito, “Aedäni. Botö oo ocæ emænte ponguimo imopa. Ìi mincayontaa Wængongui

beyæ apænedinque nāni yewæmonte angainö ante nē ēñente cædāni iñömö nāni toquinque,” ante apænecantapa.

⁸ Botö Wäömo inömo imopa. Mäninö Wængongui anquedo nänö äñinö ante nē ēñenimo inte botö mänii tömengä nänö odömöninö ante nē adimo inömo imopa. Wængongui anquedo angä ēñenique ayæ odömongä adinque botö nē odömöningä önöwa inö ædæ wæænte tömengä ingante watapæ apænecæte ante cætabopa. ⁹ Cæyömote tömengä wæætē, “Mänömaï cædämaï imäwe, angantapa. Botö önonque bitö bai Wængongui ingante nē cæbo imopa. Ayæ bitö töninadāni Wængongui beyæ nē apænedönāni tönö ii yewæmöintaa nāni angainö ante nē ēñente cædāni tönö botö tömēnāni bai adobai Wængongui ingante nē cæbo imopa cæbii. Edæ Wængonguinque ingante ædæ wææninque, Bitö Wængongui Awēnē adobique imidö anguēnē, ante apænee,” angantapa.

¹⁰ Wængongui anquedo godömenque botö imote iïmaï angantapa. “Edæ mänömaï baquiönæ oo pönï ingæimpa cæbii. Iï yewæmöintaa Wængongui beyæ apænedinque nāni angainö ante bitö wē wodönāmaï inte do apænee. ¹¹ Nē wēnæ wēnæ cædönāni inänite ee abi godömenque wēnæ wēnæ cæcædänimpa. Tömēnāni nāni pönēnö wentamö bai nē entawēnāni inänite ee abi godömenque nāni pönēnö wentamö bai entawencædänimpa. Nē nō cædāni inänite ee abi godömenque nō cæte quēwencædänimpa. Nē tæiyæ waēmö entawēnāni inänite ee abi godömenque tæiyæ waēmö entawencædänimpa.”

¹² Itota Codito, “Aedāni. Botö oo ocæ emænte

ponguïmo ïmopa. Ocæ ãmænte pöninge botö tömömo godömo nãni ænguincöo, ante næænte ponguïmo ïmopa. Tömãnãni æbãnö cædãni, ante adinque botö tömãnãni nãni cægaï ganca ante adoganca godömo æncædãnimpa. ¹³ Botö Tãnobo ingaïmo inte Tömãmo inguïmo ïmopa. Tömää badönãmaï ïñedë botö Do Quëwengãimo ïmopa. Ayæ tömää ïinque bayedë incæ botö Ayæ Pöni në Quëwëmo incæboimpa. Wëenëñedë tömää në Badongãimo inte tömää në ïinque Cæbo incæboimpa.”

¹⁴ Weocoo yamonte baï mïmönë në mënongate ïnãni ïñömö tömãnãni nãni toquinque edæ mãnï quëwëñömö wææ cædinemö ïñömö go guiquinãni ïnãnipa. Go guidinque tömãnãni quëwenguïwæ quëwenguinca bequinãni ïnãnipa. ¹⁵ Wiwa cædãni guiquënë mãnï quëwëñömö yabæque ïñömö ongonte wæquinãni ïnãnipa. Idöidi në ïnãni, në towente quëwãnãni, wacã ingante në wænönãni yabæque ongönãnipa. Wængonguï impa, ante nãni badöninca gäänë ædæ wææninque në apænedãni, në babæ ãnãni tönö, Babæ äinëmönipa, ante në ãnãni tönö tömãnãni tömãnãni mãnï quëwëñömö yabæque ïñömö quëwenguinãni ïnãnipa.

¹⁶ “Botö Itotabo ingaïmo ïmopa. Mãnïnö botö angainö ante nö impa, ante botö ïmote godongãmæ nãni pönencabodãni tömãnãni ïnãnite apænecã ëñencædãnimpa, ante cædinque botö do botö anquedo ingante mïnitö weca da pönömo pongantapa. Botö docã Awënë Dabii nãnö Wæmæncoo ingaïmo inte adobaï nãnö Pæïmo ïnömo ïmopa. Botö wadaamö baï ñãö bayö apãimö

baï imopa.”

17 Wængonguï Tæiyæ Waëmö Önöwoca tönö Wængonguï Codotedo nänöogængä nāni ānongä, “Pöedāni,” ānapa. Äñöna tömēnāni tömēna īnate nē ēñēnāni inte adobaï, “Pöedāni,” ancædānimpa, āmopa. Nē gæwænte ināni tömānāni pö becædānimpa, āmopa. Nē beinēnāni īñōnānite, Minitö quēwenguimæ, ante ōnonque pōnonguimæ incæ pö ænte becæminimpa, ante āmopa.

18 Ìi yewæmōintaa Wængonguï beyæ nē apænedāni nāni angainö ante nē ēñēnāni tömānāni inānite, Ee aedāni, botö wææ āmopa. Edæ māninö nāni angainö ante godōmenque wadö ānāni inānite Wængonguï pancæcāimpa. Ìi yewæmōintaa quiēmē nāni pante wæwenguincoo, ante yewæmonte adinque Wængonguï nē wadö ānāni inānite mānincoo baï godōmenque pancæcāimpa. 19 Ayæ Ìi yewæmōintaa Wængonguï beyæ nē apænedāni nāni angainö incæ pancadea æninque nē wëä godonte baï cædāni inānite Wængonguï quēwenguīwæ quēwenguinca godōnāmaï incæcāimpa. Tömengä adobaï, Botö tæiyæ waëmö quēwēñömö māniñömö guiidāmaï incæminimpa, ante ancæcāimpa. Māni quēwenguīwæ ante māni quēwēñömö ante Ìi yewæmōintaa yewæmonte impa.

20 Māninö ante, Nö impa, ante nē apænecā iñömö tömengä iñömö, “Ao, botö oo ocæ émænte ponguimo imopa,” angantapa. Äñongante botö,

Mänömaï baquīnö anguēnē, ante, Amëë, āninque, Awēnē Itota pöe, āmopa.

21 Awënë Itota Wængongui nänö guidënanï inänite waadete godö cæcæcäimpa. Mänömaï baquinö angüënë, ante botö, Amëë, ante mäninque ämopa.

Wængonguï nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9bedab5a-39ff-5163-a35b-8056cbbe8690